

## JOHANNI SEA NAMA KATTA

1

### Janggini Katta

**1** Chengon Katta gngangchim, ua Katta Isol baksachim aro ua Katta Isolchim. **2** Chengonin ua Katta Isol baksanchim. **3** Uachin Isol pilakkon ong'ataha; pilak ong'atgiminrangoni mingsaba ua gride ong'jaha. **4** Ua Kattaan janggi ong'achim, aro ua janggi manderangna seng'a ong'achim. **5** Seng'a andalao teng'sua aro andala uko mamingdakeba kimitna amjaha. **6** Isolni watatgimin Johan minggipa mande saksa gngangchim. **7** Ua seng'ani gimin manderangna sakki on'na re'baaha; jedakode uamang pilakan knae bebe ra'na man'gen. **8** Ua an'tangde seng'a ong'jachim; indiba seng'ani gimin sakki on'asa re'baaha. **9** Pilak manderangko seng'atgipa, ua chong'motgipa seng'a a'gilsakona re'baaha. **10** Ua Katta a'gilsakonchim. Isol a'gilsakko uchin ong'ataha; indiba a'gilsak uko uijachim. **11** Ua an'tangni manderangonan re'baachim; indiba uni manderang uko ra'chakjaha. **12** Indiba pilak uko ra'chakgiparangna aro bebera'glparangna Isolni de ong'china gita, ua uamangna bilko on'aha. **13** Uamang a'gilsakni bewalo, be'enni ba mandeni sikaoni atchijachim; indiba Isoloni atchigiparang ong'achim. **14** Ua katta mande pil'e an'chingni gesepo dongaha. Pagipani saksakamkam Depanteni rasongko gita, ka'saa aro bebean gapgipa uni rasongko an'ching nikaha. **15** Johan uni gimin sakki on'e, aganaha, "Angni ja'man re'bagipa, angna dal'batgipa ong'a; maina angni atchina skangan ua gngangchim," ine uani giminan anga na'simangna aganachim. **16** Uni ka'saa suakaoniko ua an'ching pilaknan jaksrame ka'saanirangko on'aha. **17** Isol Niamko Moseni jakchi on'aha, ka'saa aro bebeko Jisu Kristoni jakchi on'aha. **18** Darangba Isolko mamingsaloba nikkuja. Pagipa baksa chengoningipa Uni saksakamkam Depante uko parape'aha.

### Johan Baptize Ka'atgipani Katta

**19** Jerusalemo donggipa Jihudirang, Kamal dal grparangko aro Levirangko Johanona watate, "Na'ara sawa?" ine sing'on, **20** ua jechakgija srangsrang rongtalen aganchakaha; "Angade Kristo ong'ja." **21** Uamang sing'taiaha, "Indide na'ara sawasa? Na'an Elijahma?" Ua aganchakaha, "Ong'ja, angade ong'ja." Uamang sing'taiaha, "Na'a Katchinikgipama?" Ua aganchaktaiaha, "Ong'ja." **22** Uamang uo sing'taiaha, "Na'a sawa chong'mot chingna aganbo; maina chingko watatgiparangna, chinga aganepilna nanga. Na'a an'tangni gimin maiko agana?" **23** Johan aganchakaha, "Isaiahni agansoa gita, Gitelni ramako srongatbo'ine bakrao inwatgipani ku'rang, angan." **24** Watatgiminrangoni mitam Pharisrang Johano sing'aha, **25** "Na'a Kristo ong'jaode, Elijah ong'jaode, ba katchinikgipaba ong'jaode, na'a, mainasa baptize ka'ata?" **26** Johan aganchakaha, "Anga na'simangko chio napolata; indiba na'simangni gisepo saksa gnang, jeko na'simang uija **27** Uan angni ja'man re'bagnigipa; uni ja'koprangni buduko engnamangba anga kraja." **28** Jordan Chibimani nalsachi Bethanyo, jeo Johan manderangko baptize ka'atengachim, uano iarang ong'aha.

## Isolni Mes Bi'sa

**29** Salgipino Jisuni an'tangona re'baengako nike, Johan aganaha, "Hiwa, Isolni Mes Bi'sa, a'gilsakni papko ra'anggipa! **30** Uani gimnan anga aganengachim, 'Angni ja'man saksa re'baenga; indiba ua angna bate dal'batgipa ong'a; maina angni atchina skangan ua gnangchim.' Ian ua ong'a. **31** Uan sawa ong'a, uko angaba uikujachim; indiba Israelna uko uiatna anga re'baa aro chio baptize ka'ata." **32** Iako Johan sakki ong'e aganaha, "Salgioni paroa gita, Gistkni Uni kosakona ong'onbae dongako anga nikaha. **33** Anga uko uikujachim; indiba chio baptize ka'atna angko watatgipa Isol angna aganaha, 'Jeni kosako Gisikni ong'onbae dongako na'a nikgen, uan Gisik Rongtalgipao baptize ka'atgipa ong'a! **34** Anga iako nikaha, aro anga na'simangna agana; Uan Isolni Depante ong'a!"

## Jisuni Skanggipa Sninggiparang

**35** Sal gipino Johan pile an'tang sninggipa sakgnimung dongengachim. **36** Jisuni re'baengako nike ua aganaha, "Hiwa nibo! Isolni Mes Bi'sa." **37** Uni aganako knae, sninggipa sakgni Jisu baksa re'angpaaha. **38** Uamangni ja'rikbaako nike, Jisu an'pile uamangna aganaha, "Na'simang maiko am'enga?" Uamang una aganaha, "Na'ara bano dongenga, Rabbi?" (Skigipa) **39** Ua uamangna aganaha, "Re'bae nibo." Uamang re'ange uni dongramko nikeaha, aro unsalo uamang unbaksan dongaha; unon attamchibara bri kontamang ong'achim. **40** Johanni aganako knae Jisuko ja'rikanggipa sakgnioni saksara, Simon Pitorni jonggipa, Andrew ong'achim. **41** Ua adatang Simonko nikechenge, aganaha. "Chinga Kristoko (To nonggimin) nikaha. **42** Unon ua uko Jisuona rimbaaha. Jisu uko nitate, una aganaha, "Na'an Johanni depante Simon ong'a, nang ko Kephas minggen." (Iako pe'skaode Pitor, ba Ro'ong ong'a).

### Jisu Philip Aro Nathandko Okama

**43** Salgipino Jisu Galiliona re'angna mangsongaha; unon Philipko man'e, una aganaha, "Angbaksa re'bapabo." **44** Philipba, Andrew aro Pitorni donggipa songjinma Bethsaidaonin ong'achim. **45** Philip Nathanaelko man'e, una aganaha, "Jeni gimin Mose Niamo aro Katchinikgiparang sesoahachim; uko chinga man'aha, uan Josephni depante, Nazarethoni Jisu ong'a." **46** Nathanael una aganaha, "Nazarethoni maiba nama ong'katna man'ama?" Philip na aganaha, "Re'bae niboching." **47** Jisu Nathanaelni an'tangona re'baengako nike, una aganaha, "Uan kakketgipa mande, uo toi'napa gri." **48** Nathanael una aganaha, "Na'a angko maikai ui'a?" Jisu una aganchakaha, "Philipni okamna skangan, na'a dumbur bolni kokkjmao dongengon anga nang'ko nikachim." **49** Nathanael una aganchakaha, "Rabbi, Na'an Isolni Depante! Na'an Israelni Raja!" **50** Jisu una aganchakaha, "Dumbur bolni kokkimao anga nang'ko nikachim inani giminan na'a bebera'ahama? Iarangna bate dal'batgiparangkanon na'a nikgen. **51** Ua aganangkuaha, "Beben anga na'simangna agana, na'simang salgini oako aro Isolni sa'grerangni mandeni Depanteona gadoangako aro ong'oanangako nikgen."

## Kanao Bia Ka'a

**1** Gittamgipa salo Galilini Kanao bia ka'ani ong'on, Jisuni ma' gipa uno gnanngchim. **2** Jisu aro uni sninggiparangkoba ua biaona okamachim. **3** Unon alao chu bon'changoa, Jisuni ma'gipa una aganaha, "Uamango chu bon'changaha." **4** Jisu una aganaha, "Ama, na'a maina angko ja'donggaatenga? Angni sal sokkuja." **5** Uni ma'gipa chakkolrangna aganaha, "Ua na'simangna jeko agana ukon dakbo." **6** Jihudirangni dakbewal gita, ja'sujaksuna muan gni, ba muan gitam chakgipa ro'ongni basing te'dok uano dona gnanngchim. **7** Jisu uamangna aganaha, "Ia basingrango chiko gapatbo." Uamang uarango rikingona sokpile gapataha. **8** Unon ua uamangna aganaha, "Da'o mitam we'e, cha'dilgipaona ra'angbo." Uamang uko ra'angaha. Cha'dilgipa chu pilatgimin chiko ringotaha aro uko baoniko man'aha uijaha; indiba we'bagipa chakkolrangde uko uiachim. Unon cha'dilgipa chawariko okame, **10** una aganaha, "Pilakon namgipa chuko on'chenge, pekjokoa nambregijako manderangna on'a; na'ade namgipa chuko da'onaba rakkikuaha." **11** Ia skanggipa chinko Jisu Galilini Kanao dake, an'tangni rasongko parapeaha, aro uni sninggiparang uo bebera'aha. **12** Iani ja'mano ua an'tangni ma'gipa, jonggiparang aro sninggiparang baksa Kapernaumona ong'oangaha; aro uamang uno banggija salrangna dongaha.

## Jisu Torom Nokkona Re'anga

**13** Jihudirangni watchangani Alani sal sepangaha aro Jisu Jerusalemchina doangaha. **14** Ua Torom noko matchu, mes, aro paroa palgiparangni aro tangka sregiparangni asongako man'eaha. **15** Ua budurangni betsmitko dake, Torom nokoniko mes, matchurang baksa uamangko a'rikataha. Ua tangka sregiparangni paisarangko satpripraaha, uamangni mejrangko bikpilataha. **16** Ua paroa palgiparangna aganaha, "Iarangko ianoniko ra'angbo; angni Pagipani nokko antidam dakatnabe." **17** 'Nang'ni nokna

bimchipanian angko cha minokgen,' ine seako uni sninggiparang gisik ra'aha. **18** Jihudirang una aganchakaha, "Iarangko dakna nang'o bil gnanng ine mesokna, na'a mai chinko dakgen?" **19** Jisu uamangna aganchakaha, "Ia nokko rubo, aro anga sal gittamon uko chakatatgen." **20** Unon Jihudirang aganaha, "Ia Torom Nokko rikna bilsu sotbridok nangaha, na'a iako salgittamon chakatatna amgenma?" **21** Indiba ua be'entangni torom nokkosa aganengachim. **22** Ua sigiminrangoni chakatpilon, uni sninggiparang ia agana kattako gisik ra'aha; aro uamang Sastroko aro Jisuni agana kattako bebera'aha.

### Jisu Pilak Manderangkan Uia

**23** Watchangani Alao, ua Jerusalemo dongmittingo, uni daka chinrangko nike, bang'en uni bimingo bebera'aha. **24** Indiba Jisu uamango ka'dongjaha; maina ua pilak manderangkan uiachim. **26** Mandeni gimin una pilakba sakki on'e aganna nangjachim; maina ua an'tangan mandeo mai gnanng uitokachim.

3

### Jisa Aro Nikodemas

**1** Jihudirangni sason ka'gipa, Nikodemus minggipa Pharisi saksa gnanngchim. **2** Ua Jisuona walo re'bae aganaha, "Rabbi, na'a Isoloni rebagipa, skigipa ong'a ine chinga uia; maina Isol nang baksa dongjaode, pilakba nang'ni daka chinrangko dakna amja." **3** Jisu una aganchakaha, "Beben anga nang'na agana, mande kosakoni atchijaskal Isolni Songnokko nikna man'ja." **4** Nikodemus una aganaha, "Mande budepa ong'oa maidake atchitaina man'kua? Ma'ani oko gnigipa changna nape atchina man'ama?" **5** Jisu aganchakaha, "Bebekon anga nang'na agana, mande chionimung, Gisikoni atchijaode Isolni Songnoko napna man'ja. **6** Be'enoni atchigipa be'enan aro Gisikoni atchigipa gisikan. **7** Anga nang'na aganani gimin aiao inmanabe, 'Na'simang kosakoni atchitaina nangchongmota.' **8** Balwa jechi

sika uchi bala, aro na'a uni gam'ako knaa; indiba bachini balbara aro bahina balanga uko uija. Gisikkoni atchigipa sakanti uandaken ong'a." **9** Nikodemus una aganchakaha, "Iaranga maikai ong'na ama?" **10** Jisu una aganaha, "Na'a Israelni skigipa saksa ong'eba iarangko uijama?" **11** Bebekon anga nang'na agana, chingni uigimikon chinga agana, aro chingni nkgiminni giminan chinga sakki on'a; indioba na'simang chingni sakkiko ra'chakja. **12** A'gilsakni gimin aganon nas'simang bebera'jaode, salgirangni gimin anga aganode, maikai bebera'gen? **13** Salgioni ong'onbagipa Manpeni Depantena agre darangba salgichi gadoangkuja. **14** "Bakrao Mose maikai chipuko de'doaha, Mandeni Depanteba uandaken de'doako mann'a nanggen; **15** maikai uo bebera'gipa sakanti jringjrotni janggiko manna amgen. **16** Isol a'gilsakna inditan ka'saaha, ua an'tangni saksa kam'kam Depantekon on'jok; maikai Uo bebera'gipa sakanti sigija jringjrotni janggiko man'gen. **17** A'gilsakko bichal ka'china, Isol Depanteko a'gilsakona watatjaha; indiba a'gilsak maikai uchi jokatako man'gen. **18** "Uo bebera'gipa sakantikon bichal ka'ja; indiba uo bebera'gijagipakode da'on bichal ka'manaha; maina ua Isolni saksakam'kam Depanteni bimingo bebera'jaha. **19** Ua bichala ian; seng'a agilsakona re'baaha; indiba manderang seng'ana bate andalako namnikbataha; maina uamangni kamrang namjachim. **20** Namgijako dakgipa sakanti seng'ako mitchia aro an'tang kamrangko parak ong'atjana gita, ua seng'aona re'baja. **21** Bebeko dakgipa seng'aona re'baa, jedakode uni kamrang Isolo pangchake dakgiminrang ong'a ine parape'na man'gen."

## Jisu Aro Johan

**22** Iani ja'mano Jisu aro uni sninggiparang Judea jolona re'baaha. Ua uamang baksa uano donge baptize kaataha. **23** Johanba Salim sambajolni Aenono baptize ka'atangachim; maina ua biapo chi bang'achim. Manderang uona re'bae bang'en baptize ka'atako man'tokengachim; **24** maina Johanko patoko dongkujachim. **25** Unon rongtalatani gimin Johanni sninggiparang aro saksa Jihudini gisepo jegrikani ong'kataha. **26** Uamang Johannona re'bae, una aganaha, "Rabbi, nibo! Jordanni nalsachi nang baksa



donggipa jeni gimin na'a sakki on'achim; uaba baptize ka'atenga, aro uona pilakan re'anga." **27** Johan aganchakaha, "Salgioni on'giminna agre mande mamingkoba man'na amja. **28** Na'simang an'tangtangan angni agangimin kattani sakkirang ong'a. 'Anga Kristo ong'ja, indiba una skang angko watatsoaha.' **29** Namchikko man'gipaan chawari ong'a indiba un baksa dongpae knatimgipa, chawarini ripengtang, uni kurangko knae katchabea. Uandaken angni katchaaba chu'sokaha. **30** Ua dal'roroangna nanga indiba anga on'roroangna nanga."

## Salgioni Re'bagipa

**31** Kosakoni re'bagipa, pilakna batgipa ong'a; a'gilsakonigipade a'gilsaknin aro a'gilsakni gitan agana. Salgioni re'bagipa pilaknan bata. **32** Ua an'tangni nikgimin aro knagiminni giminsa sakki on'a; indiba pilakba uni sakkiko ra'chakja. **33** Uni sakkiko ra'chakgipa mande, Isol bebegipa ong'a ine ra'manaha. **34** Isolni watatgimin mande Isolni kattarangko agana; maina Isolni on'gimin gisikni ari gri. **35** Pagipa Depantena ka'saa aro uni jako pilakkon on'tokaha. **36** Depanteo bebera'gipa jringjrotni janggikon man'aha. Depanteko manigijagipa jringjrotni janggiko uina man'ja; indiba Isolni ka'onangasa uni kosako dongkama."

4

## Jisu aro Samariani me'chik

**1** Jisu an'tang baptize ka'atjaoba, uni sninggiparang **2** Johanna bate bang'bata sninggiparangko dakenga aro baptize ka'atenga ine Pharisirang knamanaha ine Jisu uioa; **3** Ua Judeako wate Galilichina re'angpilaha. **4** Ua Samaria gita nappakangna nangani gimin **5** Jakobni an'tang depante Josephna on'gimin a'ba damsani sepango donggipa Samariani Sykar minggipa songona re'baaha. **6** Uano Jakobni chia'kolba gngangchim. Songree neng'ahani gimin Jisu chia'kol sambao asonge dongaha; da'o saljatchimang ong'achim. **7** Unon Samariani me'chik saksa chi ko'na

re'baaha aro Jisu una aganaha, "Angna ringna on'bo." **8** (Uni sninggiparang cha'aniko brena songjinmachi re'angman'ahachim.) **9** Samariani me'chik una aganaha, "Maikaisa na'a Jihudi mande ong'eba, anga, Samaria me'chikoniko ringna bi'a?" (Maina Jihudiiang aro Samariarang cha'rim ringrimjachim.) **10** Jisu una aganchakaha, "Na'a Isolni on'ako aro Angna ringna on'bo ine nang'na agangipako uigenchimode, na'a uo bi'genchun, aro ua nang'na ehijanggiko ongenchim." **11** Me'chik una aganaha, "Skigipa, nang'o ko'chakani gri, aro chia'kola tu'a; na'a baoniko chijanggiko man'gen?" **12** Na'an chingni Jakobnaba dal'batama? Ua ia chia'kolko chingna on'aha; aro ianoniko an'tangba aro uni dedrang aro jakrangba ringangaha." **13** Jisu una aganchakaha, "Ia chiko ringgipa sakanti ringna siktaigen, **14** indiba anga je chiko on'gen uko ringgipa pilakan mamingdakeba ringna siktaijawa. Anga je chiko on'gen ua uno chimik ong'e, uko jringjrotni janggiona dilanggen." **15** Ua me'chik una aganaha, "Skigipa, angna ua chiko on'bo, jedakode anga ringna siktaijawa aro indita ramako ianona re'bae chi ko'ena nangjawa." **16** Jisu una aganaha, "Re'angbo, nang'ni segipako okame ianona rimbabo." **17** Me'chik una aganchakaha, "Ango segipa dongja." Jisu una aganaha, "Na'a, 'Ango segipa dongja,' ine aganaha, kakketan ong'a; **18** Indiba nang'o segipa sakbongajok, aro da'o nang'o doggipaba nang'ni segipa ong'ja. Na'a bebekon aganaha." **19** Ua me'chik Jisuna aganaha, "Skigipa, na'a saksa katchinikgipa ong'a ine anga nikaha. **20** Chingni pagitchamrang ia a'brio olakiachim, aro na'simang agana, Jerusalemsa olakiani biap aro unosa pilakan olakina nangchongmota." **21** Jisu uha aganaha, "Angko bebera'bo, sii re'baenga na'simang Pagipako ia a'brioba ba Jerusalemoba olakijawa. **22** Na'simang jeko uija uko olakia, chingade jeko uia ukosa olakia; maina jokatani Jihudirangoni ong'a. **23** Dao sal re'baenga jensalo olakichongmotgiparang gisiko aro bebeo Pagipako olakigen; maina an'tangko indake olakigipa manderangkon Pagipa am'a. **24** Isol Gisikan, aro uko olakigiparang gisiko aro bebeo olakina nanga." **25** Ua me'chik aganaha, "Anga uia Kristo (To nonga man'gipa) re'baenga. Ua re'baon an'chingna pilakkon agane on'gen." **26** Jisu una aganaha, "Nang baksa aginenggipa angan Ua." **27** Uochachan uni sninggiparang re'baaha, aro ua me'chik baksa agangrike dongengana



uamang aiao inmanaha; indiba, "Na'a maiko am'enga?" ba "Na'a un baksa maina agangrikenga?" ine saksaba uo sing'jaha. **28** Unon ua me'chik an'tang basingko donange songjinmaona daariangenba manderangna aganeaha. **29** "Angni pilak dakgiminko aganna amgipa mandeko re'bae niebo, Uan Kristo ong'jama?" **30** Uamang songjinmaoni re'ongkatbae uona re'batokaha. **31** Unomitingo sninggiparang uko mol'mole aganaha, "Rabbi, na'a cha'boaha." **32** Jisu uamangna aganaha, "Ango cha'na igita cha'ani gnang, jeko na'simang uija." **33** Sninggiparang saksa sakgipinna aganaha, "Saoba una cha'aniko ra'baahama?" **34** Jisu uamangna aganaha, "Angko watatgipani namnikako dakan aro uni kamko chu'sokatan angni cha'ani ong'a. **35** 'Rakari sokna da'o jabri dengenga; ine na'simang aganjama? Anga na'simangna agana, na'simangni mikgronrangko de'chaoe a'barangchiko niatbo, uarang minaha aro ratna namaha. **36** Ratgipa an'tangni man'gniko man'enga aro jringjrotni janggiona biteko chimongengaha; jedakode satgipa aro ratgipa katcharimna man'gen. **37** Indake saksa sata aro sakgipin ratskaa ine aganania bebe ong'a. **38** Jena na'simang neng'e gamjachim, uko ratna anga na'simangko watata; gipinrang neng'bee gam'aha aro uamangni jakmani biterango na'simang bak man'paaha." **39** Songjinmaoni bang'bea Samaria manderang uko bebera'aha; maina ua me'chik sakki on'e aganengachim, "Ua pilak angni dakgiminrangko agane on'tokaha." **40** Unon Samariani manderang uko an'tangtang baksa dongkuchina mol'molaha, aro ua uano salgnina dongaha. **41** Uni agana kattarangna sakgipinrangba bang'en bebera'aha, **42** aro uamang ua me'chikna aganaha, "Nang'ni aganani giminsan chinga bebera'ajaha; da'o chinga an'tangtangba uko knaaha, aro uan a'gilsakko jokatgipa ong'chongmota ine uiaha."

### [Jisu Subidarani Depanteko An'sengata](#)

**43** Sal gnini ja'mano Jisu uanoni Galiliona re'angaha. **44** Katchinikgipa songtango mandera'ako man'ja ine Jisu an'tangan sakki on'aha. **45** Ua Galiliona re'baoa, Galilini manderang uko rimchaksoaha; maina uamaag Watchangani Alaona re'angenba Jerusalemo pilak uni dakarangko

nikachim. **46** Ua Galilini Kanaona re'bapiltaiaha jeo ua chiko chu pilatachim. Uano rajani saksa Subidar gngangchim; uni depante Kapernaumo sae dongengachim. **47** Ia mande, Jisu Judeaoni Galiliona re'baaha ine knaoa, uona re'ange, an'tangni depanteko re'bae an'sengatchina mol'moleaha; maina ua sinasiengachim. **48** Jisi una aganaha, "Na'simang chinrangko aro aiao inmananirangko nikjaskal bebera'jawa." **49** Rajani Subidar una aganaha, "Skigipa, angni bi'sa sina skangan re'bapabo." **50** Jisu una aganaha, "Re'angbo nang'ni depante tanggnok." Ua mande Jisuni an'tangna agana kattako bebera'e re'angaha. **51** Ua ong'onangmitingon, uni nokkolrang uko gronge aganaha, "Nang'ni depante tangenga." **52** Salni badia bako ua namkalna a'bachengaha ine ua uamango sing'aha. Uamang una aganaha, "Mejalo saljatchi on'tisa badeangachibara sawaka namangaha." **53** Uochachan "Nangni depante tangginok" ine Jisu aganachim, ine pagipa uiaha. Unon ua aro uni nokgimikba Jisuo bebera'aha. **54** Ian Judeaoni Galiliona re'bae, uni daka gnigipa chin ong'achim.

## 5

Bethesda Chibolo An'sengata. **1** Iani ja'mano Jisu Jerusalemchina doangaha; maina Jihudirangni maniani sal gngangchim. **2** Jerusalemo Mes cholgugapakchi grimra dambonga gnganggipa, Ibri ku'sikchi Bethesda minggipa chibol damsa gngangchim. **8** Uano bangbea sagipa manderang mikgri, jakora aro ja'ajak sikrepgiparang chini moako nisenge dongtokengachim. **4** (Maina je saini bakoba ua chibolona sa'gre re'bae chiko moatrongachim. Unon chi moani ja'mano je mandean skang chio ong'one auea, ua je saoniba an'sengako man'achim.) **5** Bilsi kolatchichetna saenggipa mande saksa uano tue dongengachim. **6** Unon Jisu ua mande uano ruuta sairangna tue dongengachim ine uie, una aganaha, "Na'a an'sengatako man'na namnikama?" **7** Sagipa mande una aganchakaha, "Skigipa, chiko moatmitingo angko chibolo donatna gita, angni mande saksaba dongja. Angni re'angmitingon sakgipin angna skang ong'onerongaia." **8** Jisu una aganaha, "Chakatbo, nang'ni tuchakaniko ra'e

re'rorobo." **9** Ua mande bakan an'sengatako man'aha, aro an'tang tuchakaniko ra'e re'roroaha. Uan Neng'takani sal ong'achim. **10** Uni gimin Jihudirang an'sengatako man'gipa mandena aganaha, "Ian Neng'takani sal ong'a; na'a nang'ni tuchakaniko de'tommalja." **11** Ua uamangna aganchakaha, "Angko an'sengatgipa mandean angna aganaha, 'Nang'ni tuchakaniko ra'e re'rorobo.'" **12** Uamang uo sing'aha, "'De'tome re'rorobo,' ine agangipa mandea sawa?" **13** Indiba uah sawachim; ua an'sengatako man'gipa mande uijachim. Ua biapo mande jinma dongani gimin Jisu uanoni re'angskaaha. **14** Iani ja'mano Jisu uko Torom noko grange aganaha, "Nibo, na'a an'sengatako man'aha, pap ka'tainabeaha, maina nang'na maiba namjabata ong'naba donga." **15** Ua mande re'ange an'tangko an'sengatgipa mandea Jisuan ong'a ine Jihudirangna aganeaha. **16** Unon iarangko Neng'takani salo ua dakahani gimin Jihudirang Jisuko a'rikna a'bachengaha. **17** Jisu uamangna aganchakaha, "Angni Pagipa da'ona kingking jaktipgija kam ka'enga, angaba ugitan dakenga." **18** Iani giminan Jihudirang uko batesa so'otsrangna am'aha; maina ua Neng'takani salkosan pe'aigija, an'tangko Isol baksa apsan dake, Isolko an'tangni Pagipa inachim.

## Depante Ong'ani Bil

**19** Jisu uamangna aganchakaha, "Beben anga na'simangna agana, Depante skatangde mamingkoba dakna amja. Ua Pagipani dakako nikesan dakna amaia; maina Pagipa jeko daka, ukon Depanteba daka. **20** Pagipa Depantena ka'saa aro pilak an'tangni dakako una me'soka; aro iarangna dalbatgipa kamrangkoba ua una me'sokgen maikai na'simang aiao inmangen. **21** Pagipa maikai sigiminrangko chakatate janggiko on'a, uandaken Depanteba an'tangni namnikgiparangna janggiko on'a. **22** Pagipa darangkoba bichal ka'ja; indiba pilak bichal ka'aniko Depantenan on'aha; **23** maikai uamang jedake Pagipako mandera'a, Depantekoba mandera'na man'gen. Soaba Depanteko mandera'jaode, uko watgipa Pagipakon ua mandera'ja. **24** "Beben anga na'simangna agana, angni kattako knachake, angko watatgipako bebera'gipaan jringjrotni janggiko man'aha. Ua bichalona re'baja; indiba siaoni janggiona ga'bataha. **25** Beben anga

na'simangna agana, Sal re'baenga, aro da'oba ong'a, jeo sigiminrang Isolni Depanteni ku'rangko knagen, aro uko knachakgiparang tanggen. **26** Maikai Pagipa an'tangan janggini ja'pang ong'a, uandaken Depantekoba janggini ja'pang ong'china on'aha. **27** Iana agreba, ua Mandeni Depante ong'ani gimin pilak bichalni bilkoba una on'aha. **28** Na'simang iana aiao ihmanaha; maina sal re'baenga pilak gopramogiparangba uni ku'rangko knae ong'katbagen. **29** Jerangni kamrang namachim uamang jringjrotni janggiona chakatatako man'gen. Namgijako dakgiparang bichalona chakatatako man'skagen. **30** Anga an'tangni bilo mamingkoba dakna amja; Apani agana gitasa anga bichal ka'a; aro angni bichal kakket ong'a; maina anga an'tangni namnikako am'jaenga; indiba angko watatgipani namnikakosa am'a."

## Jisuni Sakkirang

**31** "Anga an'tangni gimin sakki on'ode, angni sakki bebe ong'ja. **32** Angni gimin sakki ongipa sakgipin gnang, aro anga uia; angni gimin uni sakki on'ara bebe ong'a. **33** Na'simang Johanona watataha, aro ua bebena sakki on'aha. **34** Anga mandeni sakkio pangchakade ong'ja; indiba na'simang maikai juktako man'gen anga iarangko agana. **35** Ua ching'enggipa aro teng'enggipa tochri ong'achim; aro na'simang uni teng'suao dikdiksasan katchana sikaha. **36** Johanni sakkina bate dal'batgipa sakki angko gnang. Da'o angni dakenggipa kamrang, Pagipani angna ka'e chu'sokatchina on'gimin ong'a; uarangan angko Pagipa watataha ine angni gimin sakki on'a. **37** Angko watatgipa, Apa an'tangan angni gimin sakki on'aha; na'simang maming saloba uni ku'rangko knakuja aro uni bimangko nikkuja. **38** Uni katta na'simango dongkamja; maina uni watatgipako na'simang beberaja. **39** Na'simang Sastrorargoniko am'a; maina uarango jringjrotni janggi donga ine na'simang chanchia. Uaranga angni giminsan sakki on'a. **40** Indiba janggiko man'na gita na'simang angona re'bana sikja. **41** "Mandeni rasong on'ako angna nangja; **42** indiba anga na'simangko uia; na'simangni ka'tongo Isol na ka'sara dongja. **43** Anga angni Pagipani bimingo re'baaha, aro na'simang angko ra'chakja; indiba sakgipin an'tangni

bimingo re'baode, na'simang uko ra'chakgen. **44** Saksangipa Isolni rasongko am'gija, an'tangtangskani rasongko am'gipa, na'simang maikai bebera'na ama? **45** Anga na'simangko Apana matnange agangen ine chanchinabe. Na'simangko matnanggipade Mosesa, jeo na'simang ka'donganiko donaha. **46** Na'simang Moseko bebera'ode angkoba bebera'genchim; maina angni giminan ua seaha. **47** Na'simang uni segiminiangko bebera'jaode, na'simang maikai angni kattarangko bebera'gen."

## 6

### Jisu Hajalbongana Ala

**1** Iani ja'mano Jisu Galili Sagal (Tiberia) nalsachi re'angaha. **2** Unon bang'bea jinma uko ja'rikangaha; maina sagiparangko an'sengate bilakgipa kamrangko dakako uamang nikachim. **3** Jisu a'briona doange an'tangni sninggiparang baksa asongaha. Unon Jihudirangni **4** Watchangani Alani sepangahacchim. **5** Jisu niwilwaloa bang'boa manderangni an'tangona re'baengako nikaha. Uni gimin Jisu Philipna aganaha, "Ia pilak manderangko okkaatna an'chinga baoniko chu'onga gita cha'aniko brena man'gen." **6** (Ua an'tangni daknasiako uiachim; indiba Philipko nina gitasa ua iako aganaha.) **7** Philip aganchakaha, "Ia pilak manderangna on'tiprak tikatnamangba tangka hajalsana bate pittako brena nang'genchim." **8** Uni sninggiparangoni sakgipin; Simon Pitorni jonggipa Andrew aganaha, **9** "Iano bi'sa saksa gnan, uo job mini pitta dotbonga aro na'tok manggni donga; indiba indita manderangna uara mai ong'gen?" **10** Jisu uamangna aganaha, "Manderangko asongatbo." (Ua biap gimikon samsirarachim) Unon pilak manderang asongaha, aro sak hajalbongamang mande gnanchim. **11** Unikoa Jisu pittako ra'e Isolko mittelaha, aro asonggipa manderangna sualataha. Ua na'tokkoba ra'e indaken dakaha aro uamang pilakan nanga gita cha'tokaha. **12** Uamang pilakan cha'e okkaman'oa, Jisu an'tangni sningiparangna aganaha, "Agitchagipa pe'tonggimin pittarangko chimongbo, jedakode on'tisamangba gimajawa." **13** Uandaken uamang

manderangni cha'spa job mini pitta petonggiminrangko chimongtokoa kera chi'gni ong'aha. **14** Uno donggipa manderang Jisuni ia aiao inmangipa jakmako nike aganaha. "Aigilsakona re'bagnigipa katchinikgipa ian ong'chongmota." **15** Uandaken uamang re'bae, uko rim'e raja songdranasia ine Jisu uiaha; uni gimin ua saksan a'brichina doangtaiaha.

### Jisu Chi Kosako Re'a

**16** Attam ong'ahaon uni sninggiparang sagalona ong'onangaha. **17** Uamang ringo gakate Kapernaumchina batangengachim. Unon andalbapilaha, indiba Jisude uamangona re'bakujachim. **18** Da'o balwa ta'rakbeengani gimin sagal pokpekbeaha. **19** Uamang mail gittam, ba mail brimang choangaha, unon Jisuni chi kosako ring sepang sepang re'baengako nike uamang kenaha. **20** Jisu uamangna aganaha, "Angasa, kenabe," **21** Unon uamang uko ringo gakatatna namnikaha; indiba uamang je biapona re'angengachim, uanona ua ring bakan sokangskaaiaha.

### Manderang Jisuko Am'a

**22** Sal gipino sagalni nalsachi ring bolsana agre gipin dongjahachim, aro Jisu an'tangni sninggiparang baksa ua ringo gakatjahachim, aro uamang an'tangtangrara re'angaha ine mande jinma nikaha. **23** Gitelni Isolko mittele pittako pe'gipa biap sambaona Tiberiasoni gipin ringrangba re'baaha. **24** Jisu aro uni sningiparang uano dongja ine jinma niko, uamang an'tangtangba ringrango gakate Kapernaumona Jisuko am'e re'angaha.

### Jisu Janggini Pitta

**25** Uamang uko sagal nalsachi nikeoa aganaha, "Rabbi, na'a basako ianona re'baaha?" **26** Jisu uamangna aganchakaha, "Beben anga na'simangna agana, chinrangko nikani gimin ong'ja, indiba pittarangko cha'e okkaahani giminsa na'simang angko am'enga. **27** Gimagnigipa cha'anina gamnabe; indiba jringjrotni janggiona dongkamgipa cha'anina gambo. Ia cha'aniko Mandeni Depante na'simangna on'gen; maina Pagipa Isolan an'tang bilni



mohorko uo su'aha." **28** Uamang una aganaha, "Chinga Isolni kamrangko ka'na gita maiko dakna nanga?" **29** Jisu uamangna aganchakaha, "Isolni kam ian, chongmotan jeko ua watataha, uo na'simang bebera'na nanga." **80** Uni gimin uamang una aganaha, "Chinga nike bebera'na man'na gita, na'a mai chinko daka? Na'a maiko daka? **31** An'chingni pagitchamrang bakrao mannako cha'aha; Sastroo agana gita, "Cha'china ua uamangna salgioniko cha'aniko on'aha." **32** Jisu uamangna agan'uamangna aganaha, "Beben anga na'simangna agana Mose na'simangna salgioni cha'aniko on'jachim; indiba angni Pagipasa na'simangna chong'motgipa cha'aniko salgioniko on'a. **33** Salgioni ong'onbae a'gilsakna janggiko on'gipaan, Isolni on'gipa cha'ani ong'a." **34** Uamang una aganaha, "Gitel, ia cha'aniko chingna pangnan on'bo." **35** Jisu uamangna aganaha, "Angan janggini cha'ani; angona re'bagipa sakanti mamingdakeba okkrijawa, aro ango bebera'gipa sakanti mamigdakeba ringna siktaijawa. **36** Indiba anga na'simangna agana, na'simang angko nikahaoba, angko bebera'ja. **37** Jemangko Apa angna on'aha, uamang angona re'baa aro angona re'bagipako anga mamingdakeba an'pilatjawa. **38** Antangni sika gita ong'ja, indiba angko watagipani namnikako dakna anga salgioni re'baaha. **39** Angko watatgipani nangnika ian; chong'motan angna on'giminrangoni saksamangkoba anga gimaatjawa; indiba chon'kaman salo pilakkon janggiona chakatatgen. **10** Angni Pagipani namnika ian; chongmotan Depanteko niggipa aro bebera'gipa sakanti jringjrotni janggiko man'gen, aro chon'kaman salo anga uko chakatatgen." **41** Jihudirang iani gimin miteng-miteng aganna a'bachengaha; maina ua aganachim; "Angan salgioni ong'onbagipa cha'ani." **42** Uamang aganaha, "Ia mande Josephni depante, Jisu ong'jama? An'chinga uni ma'apako uia; indide, da'o ua maikai an'tangko salgioni ong'onbaaha ine agana?" **43** Jisu uamangna aganchakaha, "Na'simangni gisepe miteng-miteng aganabe. **44** Angko watatgipa Pagipa angona salbajaskal darangba angona re'bana amja, aro ukosan bon'kaman salo anga chakatatgen, **45** Katchinikgiparang seaha, 'Pilak manderangan Isolni skiako man'gen.' Apaoniko knae skia man'gipa pilakan angona re'baa. **46** Pilakan Pagipako nikaha iade ong'ja. Jean Isoloni ong'a uasan Pagipako nikaha. **47** "Beben anga na'simangna agana,

bebera'gipaan jringjrotni janggiko man'aha. **48** Angan jringjrotni cha'ani. **49** Na'simangni pagitchamrang bakrao manako cha'eba siaha; **50** indiba salgioni ong'onbagipa cha'aniko cha'gipa sakanti sijawa. **51** Angan salgioni ong'onbagipa tanggipa cha'ani ong'a. Ia cha'aniko cha'gipa sakanti jringjrotnan tanggen. Je cha'aniko anga on'gen uan angni be'en ong'a jeko anga a'gilsakni tanggnina on'a." **52** Ian Jihudirangni gisepe ka'onange jegrikaniko an'bachengataha, "Ia mande maikai be'entangko an'chingna on'na ama?" ine uamang an'tangtangni gisepe sing'aha. **68** Jisu uamangna aganaha, "Beben anga na'simangna agana, na'simang Mandeni Depanteni be'enko cha'jaode, aro uni an'chiko ringjaode, na'simang an'tangtangode janggiko man'jawa. **54** Angni be'enko cha'gipa aro angni an'chiko ringgipa jringjrotni janggiko man'a, aro bon'kaman salo anga uko chakatatgen. **55** Angni be'en chong'motgipa cha'ani aro angni an'chi chong'motgipa ringani ong'a. **56** Angni be'enko cha'gipa aro angni an'chiko ringgipa ango dongkama aro anga uo dongkama. **57** Tanggipa Paggipa angko watataha gita aro anga Pagipana tanga gita, angko cha'gipa angna tanggen. **58** Ian salgioni ong'onbagipa cha'ani ong'a. Iade na'simangni pagitchamrangni cha'eba sigipa cha'ani gita ongja. Ia cha'aniko cha'gipa jringjrotnan tanggen." **59** Kapernaumni sinagogo skimitingo Jisu iako aganaha.

### Jringjrotni Janggin Kattarang

**60** Iako knae, uni sninggiparangoni bang'en aganaha, "Ia skiania rakdugaa. Iako sawa knachakna man'gen?" **61** Uamang aganjaoba, Jisu an'tangni sninggiparang iani gimin miteng-miteng aganenga ine uie, inaha, "Ian na'simanko ja'gitotama? **62** Mandeni Depante jeo dongachim, uona uni gadoangako na'simang nikosai? **63** Janggiko on'gipa Gisik ong'a, be'ende gamchatja. Angni na'simangna agangipa kattarangan Gisik aro janggi ong'a; **64** indiba na'simangoni mitam bebera'ja." (Jisu a'bachengantal bebera'gijagiparangko aro an'tangko bobilni jako on'gnigipako uiachim.) **65** Ua aganaha, "Iani giminan anga na'simangna aganaha, chong'motan Pagipa salbajaskal darangba angona re'bana amja."

## Pitor Jisuko Ku'chaka

**66** Iani giminan uko ja'rikgiparangoni bang'en uko watangaha aro un baksa re'angpajaha. **67** Uni gimin Jisu sakchigni sninggiparangna aganaha, "Na'simangba angko wate re'anggenma?" **68** Simon Pitor una aganaha, "Gitel chingara saona re'anggen? Jringjrotni janggini Kattarang nang'on gnang. **69** Na'an Isolni Rongtalgipa ong'a ine chinga uia, aro bebera'a" **70** Jisu uamangna aganchakaha, "Anga na'simang sakchigniko sejachimma? Indiba na'simangoni saksade diabol ong'a!" **71** Ua Simon Iskariotni depante, Judasni gimin aganengachim; maina sakchigni sninggiparangoni uko bobilni jako on'gipa Judas ong'achim.

7

## Jisu Aro Uni Joggiparang

**1** Iani ja'mano Jisu Galili jol gita songreangengachim. Jihudirang uko so'otna am'engani gimin ua Judeao songrena sikjachim. **2** Jihudirangni Jamdap-pine maniani sal sepangahani gimin **3** Jisuni joggiparang una aganaha, "Nang'ko ja'rikgiparang nang'ni kamrangko nikna man'na gita, na'a ia biapko wate Judeaona re'angbo. **4** An'tangko mingsingatna sikode pilakba mamingkoba donnue dakja. Na'a iarangko dakengani gimin a'gilsak gimikan nang'ni gimin uichina! **5** (Uni joggiparangba uko bebera'jaengachim.) **6** Jisu uamangna aganaha, "Na'simangnade je salba nama; indiba angna sal sokkujaenga. **7** A'gilsak na'simangko mitchina man'ja; indiba ang'kode mitchia; maina uni re'anirang namja ine ang a aganen dongenga. **8** Na' simang ua manianiona re'angbo, angade re'angjawa; maina angni sal sokkuja." **9** Iako aganenba ua Galilion dongrikaha.

## Jamdap Pine Maniano Jisu Dongpa'a

**10** An'tangni joggiparang manianiona re'angmanoa, uaba an'tangko nikatgija re'angpa'aha. **11** Jihudirang maniano uko am'e sing'aha, "Uara

bao?" **12** Ja'mano uni gimin bang'an agantokengachim. "Uan namgipa mande ong'a," gipinrang aganengachim, "Ong'ja, ua jinmako dilsretenga." **13** Je ong'oba Jihudirangna kenani gimin darangba uni gimin parakede aganjaha. **14** Unon maniani bimitingo Jisu Torom nokona gadoange skina a'bachengaha. **15** Jihudirang aiao inmane aganaha, "Ia mande poraigija, maikai indita skia man'a?" **16** Jisu uamangna aganchakaha, "Angni skiara angoni ong'ja; indiba angko watatgipaonisa. **17** Saoba uni sikako dakna namnikode, ia skiani Isolnima ba angoni ong'a, uko ua uigen. **18** Je mandean biltangchi agana, ua an'tangna rasongko am'a; indiba jean an'tangko watatgipani rasongko am'a, uan kakket ong'a aro uo tol'napa gri. **19** Mose na'simangna Niamko on'jachimma? Indioba na'simangoni saksaba Niamko manirongja. Na'simang maina angko so'otna am'enga?" **20** Jinma aganchakaha, "Nango kore donga, nang'ko sawa so'otna am'enga?" **21** Jisu uamangna aganchakaha, "Nengtakani salo anga kam mingsako dakaha, aro ua na'simang pilakkon dil'dil ong'ataha. **22** Mose na'simangna bigil rasotani bewalko on'aha. Uan Moseoni ong'ja; indiba pagitchamrantonisa. Uko na'simang Neng'takani salrangoba dakronga. **23** Moseni Niamko pe'jana gita mande Neng'takani salo bigil ra'sotako man'ode, indide anga Neng'takani salo saksu Mandeni saako an'sengatani gimin na'simang maina angko ka'onanga? **24** Mandeko nikari bichal ka'nabe; indiba na'simangni bichalrango kakket ong'bo."

## Uan Kristo Ong'ama?

**25** Jerusalemoni mitam manderang aganaha, "Ian uamangni so'otna am'enggipa ong'jama? **26** Indioba niboching, ua paraken aganenga, uamang mamingkoba aganna amjaha. Uan Kristo ong'a ine sason ka'giparangba uichong'motahama? **27** Ia mande baoni ong'a, an'ching uia, indiba Kristo re'baon, ua baoni ong'a pilakba uijawa." **28** Jisu Torom noko skimitingo uamangna inwate aganaha, "Na'simang angko uia; aro anga baoni na'simang uia; indiba anga an'tangni bilo ra'bajaha. Angko watatgipa bebe ong'a aro na'simang uko uija. **29** Anga uko uia maina anga uonin ong'a, aro uan angko watataha." **30** Uamang uko rim'na tekkelbeaha; indiba darangba

uni kosako jak sniljaha; maina uni sal sokkujachim. **31** Unon jinmaoni bang'en Uo bebera'e aganaha. "Kristo re'baoa, ia mandeni dakgiminrangna bate chinrangko dakgenma?"

### Jisuko Rim'na Niringiparangko Watata

**32** Jisuni gimin jinmani bang'en agananirangko Pharisirang knaaha, aro kamal dal'giparang aro Pharisirang uko rim'na nitimgiparangko watataha.

**33** Jisu uamangna aganaha, "Anga na'simang baksa dikdiksana dongkugen aro uni jamano anga angko watatgipaona re'anggan. **34** Na'simang angko am'gen, indiba angko man'jawa; maina jeo anga donga na'simang uanona re'bana amja." **35** Jihudirang an'tangtangni gisepo agangrikaha "Ua baona re'angnasia, an'chinga maikai uko am'e manjawa? Gipin ma'kringrangni gisepo ma'eke donggipa Jihudirangona re'angnasia, aro ua gipin ma'kringni manderangna skinasia? **36** Na'simang angko am'gen, indiba angko man'jawa, aro jeo anga donga uanona na'simang re'bana amja' ine ua maina agana?"

### Tanggipa Chini Chiring

**37** Maniani bon'kamgipa aro mongsongbatgipa salo Jisu chadenge inwate aganaha, "Saoba ringna sikode, angona re'bae ringechina. **38** Sastroo agana gita, 'Jean ango bebera'a, tanggipa chini chibima uni ka'tongo jokgen" **39** (Ua an'tango bebera'giparangni man'nasigipa Gisikni gimin iako aganengachim; maina unomitingo gisikko uamangna on'kujachim aro Jisu an'tangan rasongo de'doako man'kujaengachim.)

### Manderangni Gisepo ma'maleka

**40** Jinmanoni mitam iarangko knae, uamang aganaha, "Beben, ian ua katchinikgipa ong'a." **41** Gipinrang aganskaaha, "Ian Kristo ong'a;" indiba mitam agantaiaha, "Kristo Gililioni re'bagenma? **48** Kristo Daudni bitchrioni aro Daudoi donggipa gittim Bethlehemoni re'baa," ine Sastroo aganjama?" **48** Uandaken jinmani gisepo uani gimin dingtang dingtang

dake agantokaha. **44** Uamangoni mitam uko rim'na sikaha, indiba pilakba uni kosako jak on'jaha.

## Dilgiparangni Bebera'gijani

**45** Nitimgiparang, kamai dal'giparang aro Pharisirangona re'bapiloa, uamang nitimgiparango sing'aha, "Na'simang maina uko rim'bajaha?" **46** Nitimgiparang aganchakaha, "Ia mandeni agana gita pilakba agankuja." **47** Pharisirang uamangna agantaiaha, "Na'simangkoba brangatahama? **48** Sason ka'giparangoni aro Pharisirangoni saoba uo bebera'ahama? **49** Indiba ia Niamko uigijagipa jinma, sao man'giparang ong'a." **60** Skango Jisuona re'bagipa, uamangoni saksa, Nikodemus uamangna, aganaha, **51** "Mandeko knachenggija aro uni dakako uigija, an'chingni niam jekoba bichal ka'na man'ama?" **62** Uamang una aganchakaha, "Na'aba Galilionima? Sastrooniko am'e nibo, Galilioni katchinikgipa ong'katja." **53** Unon uamang sakantian noktangtangchi re'angtokaha.

8

## Til'ekao Rim'a Man'gipa Me'chik

**1** Unon Jisu Joitun a'briona doangaha, **2** Pringwalni ua Torom nokona re'bataiaha. Pilak manderang unona re'baoa, Ua asonge uamangna skina a'bachengaha. **3** Sastro skigiparang aro Pharisirang til'ekao rim'a man'gipa saksa me'chikko uona rimbaaha. Uamang uko Jisu aro an'tangtangni gisepo chadengate **4** una aganaha, "Skigipa, ia me'chikko til'ekmitingchachaon rim'aha. **5** Mo'seni Niamo dongimin gita, indakgipa me'chikko ro'ong gotatani ong'a, na'a maiko agana?" **6** Uni kosako matnanganiko ra'bana man'na gita, uamang uko majoe iako sing'engachim. Indiba Jisu bamgope a'ao an'tangni jaksichi seaha. **7** Uamang uo sing'haoa, ua chadengsronge uamangna aganaha, "Na'simangoni pap grigipa, uan uko ro'ong gotatchengchina." **8** Pil'e ua bamgope, a'ao setaiaha. **9** Uamang iako knaoa, bribatgipaoni a'bachenge saksani ja'mano saksa



re'ongkatangtokaha, aro Jisusan ua me'chik baksa ua biapo donggrikaiaha.

**10** Unon Jisu chadenge una aganaha, "Mechik, uamanga baosa? Nang'ko pilakba matnangjahama?" **11** Ua aganaha, "Pilakba gri, skigipa." Jisu aganaha, "Angaba nang'ko matnangja. Re'angbo, da'ontal pap ka'tainabeaha."

## Jisu A'gilsakni Seng'a

**12** Pil'e Jisu uamangna aganaha, "Angan a'gilsakni seng'a. Angko ja'rikgipa mamingdakeba andalao re'rurajawa; indiba janggini seng'ako man'gen." **13** Pharisirang una aganaha, "Na'a an'tangni gimin sakki on'enga, nang'ni sakki bebe ong'ja" **14** Jisu uamangna aganchakaha, "Anga an'tangni gimin sakki on'genchimoba, angni sakki bebe ong'a; maina anga baoni re'baa aro bachina re'anga, anga uia. Indiba anga baoni re'baa aro bachina re'anga uko na'simang uija. **15** Na'simang mandeni gita bichal ka'a; anga pilakkoba bichal ka'ja. **16** Anga bichal ka'omangba angni bichal kakket ong'a; maina anga saksan ong'ja; angko watatgipa Pagipa ang baksa donga. **17** Na'simangni Niamo sea gita mande sakgnini sakki bebe ong'a. **18** Anga an'tangni gimin sakki on'a, aro angko watatgipa Pagipaba angni gimin sakki on'a." **19** Uamang una aganaha, "Nang'ni Pagipara bao?" Jisu aganchakaha, "Na'simang angkoba aro angni Pagipakoba uija. Na'simang angko uiode, angni Pagipakoba uigenchim." **20** Ua ia kattarangko Torom nokni tangka donramo skimitingo aganaha. Unon pilakba uko rim'jaha, maina uni sal sokkujachim.

## Bebera'gijagiparangko Mikrakata

**21** Pil'e ua uamangna aganaha. "Anga re'angenga aro na'simang angko am'gen, indiba na'simang paptangtangon sigen. Anga jeona re'angenga na'simang uanona re'bana amjawa." **22** Jihudirang aganaha, "Ua an'tangkon so'otnakakon; maina, 'Anga jeona re'angenga uanona na'simang re'bana amjawa,' ine ua aganaha?" **23** Ua uamangna aganaha, "Na'simang ka'maoni ong'a, angara kosakoni ong'a, na'simang a'gilsakoni ong'a angade ia

a'gilsakoni ong'ja. **24** Iani giminan anga na'simangko paptangtangan sigen ine aganaha, 'Angan ua ong'a,' ine na'simang bebera'jaode, paptangtangan sigen." **25** Uni gimin uamang una aganaha, "Na'ara sawa?" Jisu uamangna aganaha, A'bachengatal anga na'simangna aganjachimma? **26** Na'simangni gimin aganna aro bichal kana anggo bang'en gnan; indiba angko watatgipa an'tangan bebe ong'a, aro anga jeko Uoniko knaaha, uko a'gilsakna agana." **27** Ua Pagipani gimin uamangna aganengachim ine uamang ma'sijaha. **28** Jisu aganaha, "Na'simang Mandeni Depanteko de'doahaon, 'Angan ua ong'a,' ine ma'sigen. Anga an'tangni bilo mamingkoba dakja; indiba Apani angna skiaha gitasa anga iarangko aganaia. **18** Angko watatgipa angbaksa gnan, ua angko saksan watkuja; maina uni namikakosan anga pangnan daka." **30** Ua iarangko aganengon bang'en Uo bebera'aha.

### Nokkol Aro Jakgitelgiparang

**31** Jisu an'tango bebera'gipa Jihudirangna aganaha, "Na'simang angni kattao dongkamode, na'simang angni chong'motgipa sninggiparang ong'a; **32** aro na'simang bebeko uigen aro bebean na'simangko jak'gitel ong'atgen." **33** Uamang una aganchakaha, "Chinga Abrahamni deritchurang ong'a aro chinga pangnaba, pilakniba nokkol ong'kuja. Na'a maikai agana, 'Na'simang jakgitel ong'gen.'" **34** Jisu uamangna aganaha, "Beben anga na'simangna agana, pap dakgipa sakanti papni nokkol ong'a. **35** Nokkol pangnan noko dongja, indiba degipasa dongkama. **36** Indide Degipa na'simangko jakgitelatode, na'simang jakgitel ong'chongmotgen. **37** Na'simang Abrahamni deritchurang ong'a ine anga uia; indiba na'simang angko so'otna am'enga; maina angni kattako na'simang knachakja. **38** Angni Pagipao anga jeko nikaha, ukon agana; indiba na'simangde pagitchamrangoniko jeko knaa ukosa daka." **39** Uamang una aganchakaha, "Abraham chingni pagipa ong'a." Jisu uamangna aganaha, "Na'simang Abrahamni dedrang ong'genchimode, uni kamrangko dakgenchim. **40** Anga Isoloniko knaej bebeko agana, aro ianan na'simang angko so'otna am'enga. Abrahamde indake dakjachim. **41** Na'simangni pagipani kamrangkon na'simang daka." Uamang una aganaha, "Chinga

deburing ong'ja, chingni Pagipa Isol saksan ong'a." **42** Jisu uamangna aganaha, "Isol na'simangni Pagipa ong'genchimode, na'simang angna ka'sagenchim, maina anga Isoloni re'baaha aro anga da'o ianon dongenga. Anga angni sika gita re'bajaha, indiba Uan angko watataha. **43** Maikaisa na'simanga angni aganako ma'sija? Na'simang angni kattako knachakja. **44** Na'simang, na'simangni pagipa diaboloni ong'a, aro na'simangni pagipani skarangkosa na'simang dakna namnika. Ua a'bachengaonin mande so'otgipa ong'a. Ua bebegipa ong'ja; maina uo bebe gri. Ua kakketgijako aganon bewaltang gitan agana; maina uan tol'gipa ong'a aro kakketgijani pagipa ong'a. **45** Indiba angade bebekon agana aro uni giminan na'simang angko bebera'ja. **46** Ango pap donga ine na'simangoni sawa mesokna ama? Anga bebeko aganode na'simang maina angko bebera'ja? **47** Saoba Isoloni ong'ode, ua Isolni kattarangko knachaka. Na'simang Isoloni ong'jani gimihsa angko knachakja."

## Jisu Aro Abraham

**48** Jihhudirang una aganchakaha, "Na'a Samariani mande aro kore chagipa ong'a ine chingni aganara kakket ong'jama?" **49** Jisu aganchakaha, "Anga kore chaja, indiba angni Pagipako anga mandera'a, aro na'simang angko mandera'ja. **50** Anga an'tang rasongko am'ja uko am'gipa aro bichal ka'gipa saksa gnang. **51** Beben anga na'simangna agana, saoba angni kattako rakkiode, ua mamingdakeba sijawa." **52** Jihhudirang una aganaha, "Na'a kore chaa ine chingni uia; maina Abraham siaha aro katchinikgiparangba siaha; indiba na'a aganenga, 'Soba angni kattako rakkiode, ua mamingdakeba sijawa,' **53** An'chingni pagipa Abraham siaha, na'a una dal'batama? Katchinikgiparangba siaha, na'ara an'tangko sawa ine chanchia? **54** Jisu aganchakaha, "Anga an'tangko rasong chaatode, angni rasong mamingba ong'ja. Angni Pagipasa angko rasong chaata, jeni gimin na'simang agana, 'Uan an'chingni Isol ong'a.' **55** Indioba na'simang uko uija, indiba anga uko uia. Anga uko uija ine aganode angaba na'simang gita tol'gipa ong'genchim; indiba anga uko uia aro uni kattako rakkia. **56** Na'simangni pagipa Abraham angni salko nikna ka'srokachim; aro ua uko

nike katchaaha." **57** Jihudirang una aganaha, "Na'a bilsu sotbonga an ong'kuja, na'a Abrahamko nikahama?" **58** Jisu uamangna aganaha, "Beben anga na'simangna agana Abrahamni atchina skangan 'Anga' donga." **59** Unon uamang uko gotatna, ro'ongrangko koltokaha; indiba Jisu an'tangko dongnue Torom nokoni re'ongkatangaha.

9

## Jisu Mikgri Atchigipako Nikata

**1** Jisu re'angon, atchiaonin mikgrigipa saksa mandeko nikaha. **2** Uni sninggiparang uo sing'aha, "Skigipa, ua mikgri ong'e atchina sawa pap ka'aha; ia mandeana, ba uni ma'apama?" **3** Jisu aganchakaha, "Ua mandeni ba ma'apani paprangni gimin ong'ja; indiba Isolni bilakgipa kamko uo parape'na gitasa, ua mikgri ong'e atchiaha. **4** Sal dongengon angko watatgipani kamranko anga ka'na nanga. Wal re'baenga jeo pilakba kam ka'na amja. **5** A'gilsako dongmitingo angan a'gilsakni seng'a ong'a." **6** Ua iako aganmanon, a'ao stuenba, ua stuchi a'dubek dakaha, aro ua mandeni mikgronrango a'dubekko nonge, **7** Una aganaha, "Siloam (Watata) minggipa chibolona're'ange miksuebo." Ua re'ange miksueaha, aro ua nikna man'e re'bapilaha. **8** Noksulrang aro skango uko bi'amgipa ong'achim ine nikgiparang aganaha, "Ian asonge bi'amronggipa mande ong'jama?" **9** Mitam aganaha, "Ian ua," gipinrang aganaha, "Ong'ja, ian ugita dakgipa ong'a." Ua mande an'tangan aganaha, "Angan Ua." **10** Uamang una aganaha, "Indide nang'ni mikgronrangko maikaisa oaha?" **11** "Ua aganchakaha, "Jisu minggipa mande, a'dubek dake angni mikgronrango nonge, angna aganaha, 'Siloamona re'ange miksuebo,' Uni gimin anga re'ange miksueaha, aro nikna man'aha." **12** Uamang una aganaha, "Uara bao?" ua aganchakana, "Anga uija."

## Pharisirang An'sengatani Gimin Sing'roka

**13** Uamang ua skango mikgrigipa mandeko Pharisirangona rimangaha;

maina **14** Neng'takani salon Jisu a'dubekko dake ua mandeni mikgronrangko oahachim. **15** Pharisirangba ua maikai nikna man'aha ine changsa uo sing'taiaha. Ua uamangna aganaha, "Ua a'dubekko angni mikgronrango nongaha aro anga miksuo a nikna man'aha." **16** Pharisirangoni mitam aganaha, "Ia mande Isoloni ong'ja maina ua Neng'takani salko manija." Sakgipinrang aganaha, "Papi mande ong'ode, maikai indakgipa chinrangko dakna man'a?" **7** Indaken uamangni gisepo dingtangrikani ong'aha. **17** Uamang mikgrigipa mandena agantaiaha, "Nang'ni aganbagimin gita ua nang'ni mikgronrangko oaha, na'a uni gimin maiko agana." Ua aganaha, "Uan katchinikgipa ong'a." **18** Indiba ua mande mikgrichim aro nikpilna man'aha ine ua mandeni ma'apako okame, uamango sing'jaskal Jihudirang ia agananiko bebera'jaha, **19** aro uamango sing'aha, "Ian na'simangni depantema jeko na'simang mikgri atchiachim ina? Indiba ua da'o maikai nikaha?" **20** Uni ma'apa aganchakaha, "Ian chingni depante ong'a aro ua mikgri ong'e atchiachim ine chinga uia; **21** indiba da'o ua maikai nikaha, ba sawa uni mikgronrangko oaha chinga uija. Uo sing'bo, uan del'gimin mande ong'a; ua an'tangni gimin aganna man'gen." **22** Jihudirangna kenani gimin uni ma'apa uamangna indake aganachim; maina uko saoba Kristo ong'a ine aganode, uko a'pal gale chelatna nanggen ine uamang tik ka'somanachim. **28** Iani giminan uni ma'apa aganaha, "Ua dal'gimin mande ong'aha, uo sing'bo." **24** Uandaken gnigipa changna uamang je mandean mikgrichim, uko okame, una aganaha, "Isolko rasong chaatbo. Ia mande papi ong'a ine chinga uia." **25** Ua aganchakaha, "Ua papi ong'ama ong'ja anga uija, mingsako anga uia; anga mikgrichim aro da'o anga nika." **26** Uamang una aganaha, "Ua nang'na maiko dakaha, ua nang'ni mikgronrangko maikai oaha?" **27** Ua uamangna aganchakaha, "Anga na'simangna aganman'aha, aro na'simang knachakja. Na'simang maina knataina sika? Na'simangba uni sninggiparang ong'pana sikama?" **28** Unon uamang manenge aganaha, "Na'an uni sninggipa onga, chingade Moseni sninggiparanga. **29** Mosen a Isol aganaha ine chinga uia; indiba ia mandea baoni ong'skaa chinga uija." **30** Ua mande aganchakaha, "Ia mande baoni ong'a uko na'mangni uigijanian aiao inmanani ong'a; indioba ua angni mikgronrangko oaha! **31** An'ching

uia Isol papirangko knachakja, indiba saoba uko mandera'e uni namnikako dakode, Isol uko knachaka. **32** Mikgri ong'e atchigipa mandeni mikgronrangko saoba oaha ine an'chinga mamingsoloba knakujachim. **33** Ia mande Isoloni ong'jagenchimode, ua mamingdakeba iako dakna man'jawachim." **34** Uamang una aganchakaha, "Na'a chugimikan paponi ong'baa, aro na'a chingna skipilama?" Unikoa uamang uko a'pal galataha. **35** Uamang uko a pal galataha ine knaoa, Jisu uko grange aganaha, "Na'a Mandeni Depanteo bebera'ama?" **36** Ua aganchakaha, "Skigipa, uara sawa, anga maikai uo bebera'na man'gen". **37** Jisu una aganaha, "Na'a uko nikaha, aro ua nang baksa agangrikgipaan ong'a." **38** Ua aganaha, "Gitel, anga bebera'a," aro ua uni mikkango tuchikkope uko olakiaha. **39** Jisu aganaha, "Bichal ka'na anga ia a'gilsakona re'baaha; jedakode mikgrirang nikna man'gen aro nikiparang mikgri ong'gen." **40** Un baksa donggipa Pharisirang iako knae aganaha, "Chingara mikgrirangma?" **41** Jisu uamangna aganaha, "Na'simang mikgri ong'genchimode, na'simang pap gri ong'genchim. 'Chinga nika,' ine aganengani giminan na'simango pap dongkua."

10

## Mes Jakni Gimin Toe Skia

**1** "Beben anga na'simangna agana, Cholguga gita napgija dintangchiko gakate, mes nolo napgipa cha'ugipa aro dokprete ra'gipa ong'a. **2** Mesrangko nirikgipa cholguga gita napa. **3** Do'ga dongtingipa una do'gako osoa aro mesrangba uni ku'rangko knachaka. Ua an'tangni mesrangko biming minge okama aro uarangko dilongkatanga. **4** Ua an'tangni mesrangko moongkatmanoa uarangna skang re'a, mesrangba uni ku'rangko uiani gimin uko ja'rika. **5** Uarang agittal manderangko ja'rikja; indiba uoni katpila, maina uarang agittalrangni ku'rangko uija." **6** Jisu uamangna ia toe skianiko aganaha; indiba ua uamangna maiko aganengachim, uamang masijaha.



## Jisuan Nama Nirikgipa

**7** Jisu agantaiaha, "Beben anga na'simangna agana, angan mesrangni cholguga ong'a. **8** Pilak angna skang re'bagiparang cha'ugiparang aro dokprete ra'giparang ong'a, aro mesrang uamangko knachakjachim. **9** Angan cholguga aro ang gita saoba napbaode, uan jokatako man'gen aro naprurae cha'aniko man'gen. **10** Cha'ugipa cha'una, so'otna aro gimaatna re'baa. Anga re'baaha, maikai uamang janggiko man'gen, aro uko suakpile man'gen. **11** Angan nama nirikgipa ong'a. Nama nirikgipa mesrangna janggitangko on'chaka. **12** Tangkanasan kam ka'aigipa mande nirikgipa ong'ja, ba mesrangni nokgipa ong'ja. Se'el re'baako nikode, ua mesrangko watgale kata. Unon se'el uarangko balanga aro bilding-bildingata. **13** Ua tangkanasan kam ka'gipa ong'ani gimin mesrangna simsakja. **14** Angan nama nirikgipa ong'a. Anga angni mesrangko uia aro angni mesrangba angko uia. **15** Pagipa angko uia gita, angaba Pagipako uia, aro mesrangna anga angni janggiko on'chaka. **16** Ia noloni ong'gijagipa angni gipin mesrangba gnangpitti, uarangkoba anga mobana nanga, uarangba angko knachakgen, jedakode nirikgipa saksan aro jaksan ong'gen. **17** Pagipa angna ka'saa; maina anga angni janggiko on'chaka, jedakode anga uko man'pilna amgen. **18** Pilakba uko angoniko ra'angja; indiba anga an'tangan namnike uko on'chaka. Iako anga an'tangan on'na aro ra'pilna bil gnang. Iakon dakchina angni Pagipa angna aganaha." **19** Ia kattarangni gimin pile Jihudirangni gisepo dingtanggrikani ong'kattajaha. **20** Uamangoni bang'en aganaha, "Ua kore chagipa aro pagla ong'a. Na'simang maina uko knatimenga? **21** Sakgipinrang aganaha, "Iarang Kore chagipani kattarang ong'ja. Kore chagipa mande mikgri manderangni mikgronrangko ona amama?"

## Jihudirang Jisuko Jechaka

**22** On'kanganiko maniani Jerusalemo ong'aha, aro unomiting sin'kari ong'engachim. **23** Jisu Torom nokni, Solomoni Grimrao re'ruraengachim. **24** Unon Jihudirang uko changdule una aganaha, "Na'a maina indita

chingko jajrengate dona, na'an Kristo ong'chongmotode, chingna paraken agansrangboaha." **25** Jisu uamangna aganchakaha, "Anga aganaha, indiba na'simang bebera'ja. Angni Pagipani bimingo daka kamrangan angni gimin sakki on'enga. **26** Indiba na'simang angni mesrang ong'jani gimin ango bebera'ja. **27** Angni mesrang angni ku'rangko knachaka, anga uarangko uia, aro uarang angko ja'rika, **28** Anga uamangna jringjrotni janggiko on'a. Uarang mamingdakeba gimajawa aro pilakba uarangko ang jakoniko ra'sekjawa. **29** Angna iarangko on'gipa, angni Pagipa pilakna bate dal'bata, aro Pagipani jakoniko pilakba mamingkoba ra'seka'angna amja. **30** Apamung anga saksan ong'a." **31** Unon Jihudirang uko ro'ong gotatna ro'ongrangko koltokaha. **32** Jisu uamangna aganchakaha, "Anga na'simangna Pagipaoniko bang'a nama kamrangko mesokaha, uarangi badia kamna na'simang angko ro'ong gotatnasia?" **33** Jihudirang una aganchakaha, "Nama kamni giminde chinga nang'ko ro'ong gotatjaenga, indiba kal'stapani giminsa; maina na'a mande ong'eba an'tangko Isol daka," **34** Jisu uamangna aganchakaha, "Na'simangni Niamo indake sea dongjama? 'Auga agana, Na'simangan isolrang ong'a'? **35** Jemangona Isolni katta re'baaha uamangko isolrang inaha, aro ua Sastroko dingtangatna manja **36** Jeko Isol rongtalate a'gilsakona watataha, uko, 'Angan Isolni Depante,' inani gimin, "Na'a kalstapa" inama? **37** Anga Pagipani kamrangko dakjaengode na'simang angko bebera'nabe; **38** indiba anga uarangko dakenga. Na'simang angko bebera'jaoba, kamrangkode bebera'pabo; jedakode Pagipa ango gnang aro anga Pagipao gnang ine na'simang ma'sina aro uina man'gen." **39** Uni gimin uamang uko rim'na jotton ka'taiaha, indiba uamangni jakrangonin ua uijapile jokangaha. **40** Jordan nalsachi, jeo skango Johan baptize ka'atgipa baptize ka'atengac bim, uanonan Jisu re'angtaiaha, aro ua uano dongaha. **41** Unon bang'en uona re'bae aganaha, "Johan maming aiao inmananiragko dakjachim; indiba ia mandeni gimin pilak Johanni agana kattarang kakket ong'a." **42** Indake uano bangen uo bebera'aha.

## Lazarusni Sia

**1** Mariam aro uni abitang Marthani song, Bethanyo Lasarus minggipa mande saengachim. **2** Uan, Gitelni ja'ao similigipa toko nonge knitangchi usitgipa Mariamni jonggipa ong'achim. **3** Uni gimin abitangrang Jisuona watate aganataha, "Gitel, nang'ni ripeng saenga." **4** Iako knae Jisu aganaha, "Ia sa'ania siana ong'ja; indiba Isolni rasongnasa ong'a; jedakode Isolni Depanteko uachi rasong chaatna man'gen." **5** Martha, Mariam aro Lazarusna Jisu ka'saachim. **6** Ua saengachim ine knaoba ua an'tangni dongenggipa biapon salgnina dongangkuaha. **7** Uni ja'manosa ua an'tangni sninggiparangna aganaha, "Hai an'ching Judeachi re'taina." Sninggiparang una aganaha, "Gitel, mejasamangmang Jihudirang nang'ko ro'ong gotatna am'engachim; na'a uchian re'angtaiengama?" **9** Jisu aganchakaha, "Salsao konta chigni dongjama? Salo re'ode mande jagitotja, maina ua ia a'gilsakni seng'ako nika; **10** indiba ua walo re'ode, ua jagitota; maina uo seng'a gri." **11** Iako aganenba ua aganangkuaha, "An'chingni ripeng Lazarus tusiaha; indiba uko demensana anga re'enga." **12** Sninggiparang una aganaha, "Gitel, ua tusiaiode, namgen." **13** Jisu uni siani giminsa aganengachim; indiba uamang tusibewalni giminsa aganenga ine chanchiskaengachim. **14** Unon Jisu uamanga rongtalen aganaha, "Lazarus siaha. **15** Anga uano dongjahana na'simangni gimin katchaa; maina na'simang bebera'na man'gen. Hai an'ching uanona re'na." **16** Unon Jonja minggipa Thomas sninggipaskarangna aganaha, "Hai an'chingba un baksa re'e sipana .

## Jisaan Chakatpilanl aro Janggi

**17** Jisu re'baon, Lazarus gopramo sal bri ong'pilaha ine nkeaha. **18** Bethany Jerusalemoni sepangchim, mail gnimangsanchim. **19** Martha aro Mariamko uamangni jonggjpani gimin kadimeatna bang'a Jihudirang re'baaha. **20** Jisu re'baenga ine knaon Martha uko grongna re'angaha; indiba Mariam nokon dongrikaha. **31** Unon Martha Jisuna aganaha, "Gitel, na'a iano donggenchimode, angni jonggipa sijawachim. **22** Da'omangba, na'a jeko Isoloniko bi'a, ua nang'na on'gen ine anga uia." **23** Jisu una

aganaha, "Nang'ni jonggipa chakatpilgen." **24** Martha una aganaha, "Bon'kaman salo chakatpilon, ua chakatpilgen ine anga uia. **25** Jisu una aganaha, "Angan chakatpilani aro Janggi. Ango bebera'gipa siomangba tanggen. **26** Ango donggipa aro bebera'gipa sakanti mamingsaloba sijawa. Na'a iako bebera'ama?" **27** Ua una aganaha, "Oe, Gitel, a'gilsakona re'bagipa, Isolni Depante, na'an Kristo ong'a ine anga bebera'a."

## Jisu Grapa

**28** Ua iako aganenba, re'ange an'tangni nogipa Mariamko okameaha, aro ua una srisrik aganaha, "Gitel re'baaha aro ua nang'ko okamenga." **29** Mariam iako knaon bakan cbakate uona re'baaha. **30** Dao Jisu songona sokbasrangkujaengachim; indiba Marthani uko grongegipa biaponpittichim. **31** Unon Mariam baksa noko donge, uko ka'dimeatenggipa Jihudirangba, uni bakan chakate re'ongkatangako nike, uko ja'rikangaha; maina ua gopramona re'ange grapnakenga ine uamang chanchiaha. **32** Jisuni donggipa biapona re'bae nikon; ua uni ja'ao ga'ake aganaha, "Gitel, na'a iano donggenchimode, angni jonggipa sijawachim." **33** Jisu, uni aro un baksa jarikbaenggipa Jihudirangni grapako nikaha. Unon uaba duk man'e, rangspite aganaha, **34** "Na'simang uko bano gopaha?" Uamang una aganaha, "Gitel re'bae niebo." **35** Jisu grapaha. **36** Unon Jihudirang aganaha, "Nibo, ua una mairongpile ka'saachim." **37** Indiba uamangoni mitam aganaha, "Mikgri mandeni mikgronrangko ogipa mandea, ia mandeni siako champengna man'jawachimma?"

## Lazarusko Tangchaata

**38** Jisu dukko mesoktaie gopramona re'baaha; uan rong'kolsachim aro uko ro'ong mittutekachim. **39** Jisu aganaha, "Ro'ongko jitatbo." Ua sigipa mandeni abitang Martha una aganaha, "Gitel, da'onade sengginok, un siaan sal bri ong'pilaha." **40** Jisu una aganaha, "Anga nang'na aganjachimma, na'a bebera'ore, Isolni rasongko nikgen?" **41** Uni gimin uamang roongko jitataha, rao Jisu salgichiko nigitoe aganaha, "Apa, na'a angko

knachakahani gimin anga nang'ko mittela. **42** Anga an'tangan uia na'a angko pangnan knachaka; indiba chadengdulenggipa manderangni giminsa anga iako agana; jedakode na'an angko watataha ine uamang uina man'gen." **43** Iako aganenba ua gam'bee inwate inaha, "Lazarus ong'katbabo." **44** Unon, ua sigipa mande, ja'a-jak ba'ra kaa gnang aro mikkango ba'ra remrema gnang ong'katbaaha. Jisu uamangna aganaha, "Uko engbo aro re'china on'bo."

### Jisuko So'otna Melaprua

**45** Uni gimin Mariamona re'bagipa bang'a Jihudirangan uni dakako nike uo bebera'aha. **46** Indiba uamangoni mitam Pharisirangona re'ange Jisuni dakako uamangna aganaha. **47** Unon kamal dal'giparang aro Pharisirang (Sandedrin) malaaniko tom'ate aganaha, "Ia mande bangen chinrangko dakenga, an'chinga maiko dakenga? **48** An'chinga uko indaken dakna on'angaiode, pilakan uo bebera'gen; aro ja'mano Romeni manderang re'bae an'chingni a'songko aro ma'kringkoba nisiatgen." **49** Uamangoni saksa, ua bilsio Kamal Dal'batgipa ong'gipa, Kaiaphas uamangna aganaha, "Na'simang mamingkon uija, **50** manderangna aro an'chingni ma'kring gimik gimajana gita, na'simangna saksa mandeni sian nambata." **51** Iako ua an'tangoniko aganjachim; indiba ua bilsio, Kamal Dal'batgipa ong'e, ma'kringna Jisu sina nanga ine katchinike aganaha. **52** Ma'kringmangmangnasan ong'aigija, bildingbildang dongenggipa Isolni dedrangkoba toksan chimongna nanggenchim. **53** Uni gimin ua saloni Jihudirang Jisuko so'otna tik ka'srangaha. **54** Uni gimin Jisu, Jihudirangni gisepd mikangparake re'rurajaha; indiba uanoni bakrani sepang jolni Ehpraim minggipa songjinmaona re'angaha, aro uano ua sninggiparang baksa dongaha. **55** Unon Jihudirangni Watchangni Alani sepangaha, aro songrangoni Jerusalemona bang'en an'tangtangko rongtalatna doangaha. **56** Uamang Jisuko am'e an'tangtangni gisepo aganengachim. "Na'simang maikai chanchia? Ua alaona re'bajawama, ba re'bagenma?" **57** Saoba, ua bano donga uiode, uko rim'na man'na gita, uiatna nangchongmota ine kamal dal'giparang aro Pharisirang ge'etaniko donaha.

## Jisuko Bethanyo To Nonga

**1** Watchangni Alanina saldok skang Jisu Bethanyona re'baaha. Lazarus uano gnangchim, jeko ua sigiminrangoniko chakatataha. **2** Uamang una cha'aniko uano sachisoaha, aro Martha dangdike on'aha, Lazarus unbaksa cha'na asongpaenggiparangoni saksa ong'achim. **3** Unon Mariam poagnimangni similbegipa aro dam rakbegipa toko Jisuni ja'arango nonge, an'tangni knichin uni ja'arangko usitaha. Ua nok gimikon to similgopaha. **4** Judas Iskariot, uni sninggiparangoni saksa, jean uko bobilni jako on'nasiachim, aganaha, **5** "Ia similgipa toko mainasa ritchaskumang tangkana palenba kangalrangna on'jajok?" **6** Ua iako kangalrangna chanchie aganade ong'jachim; indiba ua cha'ugipa ong'achim. Ua rongdikra ong'e, rongdikoniko cha'urongachim. **7** Jisu aganaha, "Uni sika gita dakchina on'bo; angko gopani salona ua similgipa toko donchina on'bo. **8** Na'simang baksa kangalrang pangnan donga, indiba anga dongkamjawa."

## Lazarusni Kosako Melaprua

**9** Jisu Bethanyo donga ine uioa, Jihudirangoni bang'bea jinma re'baaha. Jisuni giminsan uamang re'bajachim; indiba sigiminrangoniko tangchaatgipa Lazaruskoba nina re'baaha. **10** Kamal dal'giparang Lazaruskoba so'otna tik ka'soman'ahachim; **11** maina uni a'selan bang'a Jihudirangan uamangko wate Jisuko bebera'engachim.

## Jerusalemo Rasong Chae Napa

**12** Sal gipino Alaona re'bagipa bang'bea jinma, Jisu Jerusalemchina re'baenga ine knasoaha. **13** Unon uamang Kejur cheksirangko ra'e uko rimchaksona re'ongkatangtokaha. Uamang inchrotokengacchim. Hojana! Pattia man'gipa, Gitelni bimingo re'bagipa! Pattia man'gipa, Israelni Raja!" **14** Jisu gada mangsako mane, uni kosako gakataha; jedake Sastroo sesoahachim; **15** "Da'ken, Zionni demechik; Nibo, nang'ni Raja. Gada



bi'sani kosako gakate re'baenga." **16** Skangode uni sninggiparang iako ma'sikujachim; indiba Jisuko rasong chaatahaon, uni giminan iako sesoaha aro manderang pilakan iarangko unan dakaha ine uamang gisik ra'aha, **17** Ia, jinma, Lazarusko gopramoniko okame siaoniko chakatatmitingo uano dongachim aro uamang una sakkiko on'aha. **18** Unon pilak jinmaba ia aiao inmananiko knaahani gimin uko rimchaksona re'angsoaha. **19** Pharisirang saksa sakgipinna aganaha, "Niboching, an'ching mamingkoba dakna amjaenga; a'gilsak gimikan uni ja'man re'angaha!" **20** Alao olakina doanggiparangni gisepo mitam Greekrangba gnanngchim. **21** Galili, Bethsaidaoni Philipona re'ange uamang mol'mole aganaha, "Skigipa, chinga Jisuko nikna sikachim." **22** Philip, Andrewona re'bae aganaha; unon Andrew aro Philip damsan re'bae Jisuna aganaha, **23** Jisu uamangna aganchakaha, "Sal sokaha, da'o Mandeni Depanteko rasong chaatna nanga. **24** Beben anga na'simangna agana, gomni bitchil a'ao ga'ake sijaode, ua rongsamangmang dongaia; indiba ua siahaode bang'en bite nanga. **25** Janggitangna ka'sagipa uko gimaata, aro ia a'gilsako janggitangna ka'sanikgijagipa jringjrotni janggina uko ripinggen. **26** Soaba angna dangdike on'genode, angni ja'man re'bapachina; maikai jeo anga donga uanon angna dangdike on'gipaba donggen. Saoba angna dangdike on'genode, Apaba uko mandera'gen."

### Jisu An'tang Signini Gimin Agansoa

**27** Da'o angni janggi jingjengenga, aro anga maiko agangen. Apa, ia saloniko angko jokatbo ine anga agangenma? indiba ianan anga re'baaha. **28** Apa, nang'ni bimingko rasong chaatbo." Unon salgioni ku'rang ong'baaha, "Anga uko rasong chaataha, aro anga pil'e uko rasong chaatgen." **29** Uano chadengenggipa jinma iako knae "Mikka Kimpreta," ine aganaha; sakgipinrang aganaha, "Sa'gre Una aganaha." **30** Jisu aganchakaha, "Ua ku'rang angni gimin ong'ja, indiba na'simagni giminsa. **31** Da'o ia a'gilsakni bichal ong'engaha, aro ia a'gilsakni sason ka'gipako a'rikatgen. **32** Angko ia a'gilsakoniko de'doman'ahaon, anga pilak manderangkon an'tangona salbakgen." **33** (Ua maidake sina nanggenchim

uako me'osksoe iako aganaha.) **34** Jinma aganchakaha, "An'chingni Niamo agana, Kristo jringirotna donggen. Indiba Mandeni Depanteko de'doatna nanggen ine na'a maikai agana. Ia Mandeni Depantea sawa?" **35** Jisu uamagna aganchakaha, "Na'simangni gisepo seng'a dikdiksana dongkugen. Andala na'simangko srapjana gita, seng'engpition re'rurabo; maina andalao re'ruragipa bachina re'enga, ua an'tangan uija. **36** Seng'engpittion na'simang seng'ao bebera'bo; jedakode na'simang seng'ani dedrang ong'bana man'gen." Iako aganenba Jisu uamangoni re'anga dongnueaha.

### Jihudirangni Bebera'gijani

**37** Uamangni mikkango inidita chinrangko dakahaoba, uamang uo bebera'jaha. **38** Isaiiah katchinikgipani ia agangimin katta chu'sokna gita ian ong'aha. — "Gitel chingni kattako sawa bebera'aha? Aro Gitelni bilko sana parape'aha?" **39** Uamang bebera'na man'jaha; maina Isaiiah agantaiaha; **40** "Uamangni mikgronrangchi nikjana, Uamangni gisikrahgchi ma'sijana, Aro gisik pil'e an'sengatako man'jana, Uamangni mikgronrangko ua mikgriataha, Aro uamangni ka'tongrangko rakataha." **41** Isaiiah Jisuni rasongko nike, uni giminan iako aganahachim. **42** Indake ongenchimoba bang'en sason ka'giparangmanba uo bebera'aha; indiba a'pal gala man'na Pharisirangna kenani gimin uamang uko ku'chakjachim; **43** maina uamang Isoloni rasongko man'ana bate manderangni rasong on'ako man'na namnikbatachim.

### Jisuni Kattachin Bichal Ka'gen

**44** Jisu inwate aganaha, "Angko bebera'gipa, angosan ong'ja, indiba angko watatgipao bebera'aha; **45** aro angko nikgipa, angko watatgipakon nikaha. **46** Anga a'gilsakni senga ong'e re'baaha, jedakode angko bebera'gipa sakanti andalao dongjawa. **47** Angni kattarangko knae manigijagipako anga bichal ka'ja; maina anga a'gilsakko bichal ka'na re'bajaha; indiba a'gilsakko jokatnasa. **48** Angni kattarangko ra'chakgija jegalgipako bichal ka'gipa gnang; angni agangipa kattarangan chon'kaman salo uko bichal ka'gen. **49**

Anga an'tangni bilo agankuja indiba angko watatgipa Pagipa an'tangan maiko inna nanga aro maiko aganna nanga uko ge'etmanaha. **50** Uni ge'etgiminrang jringjrotni janggi ong'a ine anga uia. Anga jeko agana, Apani agangimin gitasan anga aganaha."

13

### Jisu An'tang Sninggiparangni Ja'arangko Ja'suata

**1** Ian Watchangni Alanina skanggipa sal ong'achim. Ua a'gilsakko wate Pagipaona re'ani sal sokaha ine Jisu uiaha. Ua ia a'gilsako an'tangni manderangna ka'saachim aro chon'kamaona kingkingan ua uamangna ka'saaha. **2** Simon Iskariotni depante, Judas, uko bobilni jako on'na hanga ine diabol donsoman'ahachim. **3** Jisu miattam cha'mitingo, Pagipa an'tangni jako pilakkon on'manaha aro Ua Isoloni re'baaha aro Isolonan re'angenga ine uie, **4** Ua cha'ramoni chakate an'tangni chinpakra ba'rarangko done, ba'ra siksako ra'enba kang'kare kae **5** rangkareo chi rue sninggiparangni ja'suate, an'tangni kang'kareo wentonggipa ba'rachi ipakna a'bachengaha. **6** Ua Simon Pitorona sokeon, Pitor Una aganaha, "Gitel na'a angni ja'arangkoba ja'suatnasiaama?" **7** Jisu una aganchakaha, "Anga maiko dakenga na'a uikuja; indiba ja'mano na'a ma'sigen." **8** Pitor una aganaha, "Na'a mamingdakeba angni ja'arangko ja'suatna nangja." Jisu una aganchakaha, "Anga nang'ko ja'suatjaode, na'a ang baksa bak nangpaja." **9** Unon Simon Pitor una aganaha, "Gitel, indide angni ja'arangkosan ong'aigija angni jakrangko aro skokoba auatbo." **10** Jisu una aganaha, "Aumangiminko ja'arangko ja'suatana agre nangani gri; maina an'gimikan rongtala. Na'simang rongtala; indioba na'simang pilakande ong'ja." **11** Jisu an'tangko bobilna on'nasienggipa mandeko uiachim. Iani giminan ua aganaha, "Na'simang pilakande rongtala ong'ja." **12** Ua uamangni ja'arangko ja'suatmanoa an'tangni chinpakra ba'rarangko chine, asongenba, uamangna aganaha, "Na'simang angni dakako ma'siama? **13** Na'simang angko 'Skigipa aro 'Gitel,' ina. Na'simang bebekon agana; maina anga indaken ong'bebea. **14** Indide anga na'simangni 'Gitel,' aro 'skigipa' ong'eba;

na'simangko ja'suatahaode, na'simangba saksa sakgipinko ja'suatgrikna nanga. **15** Anga na'simangna. dakmesokaniko on'aha; na'simangba, anga jedake na'simangna dakaha, uandaken dakbo. **16** Beben anga na'simangna agana, nokkol gitelna bate dal'batja. **17** Iarangko uie na'simang ugita dakode, na'simang an'senga. **18** Na'simang gimikni gimin anga aganja; angni segiminrangko anga uia. Indiba 'Angni pittako cha'gipan angni bobil, me Sastroo sea kattarang chu'sokna nanggen. **19** Ia ong'na skangan anga da'on na'simangna aganengaha; maikai iarang ong'ahaon na'simang 'Angan Ua' ine bebera'na man'gen. **20** Beben anga na'simangna agana, jean angni watatgipako ra'chaka, angkon ra'chaka, aro jean ang to rachaka angko watatgipako rachaka."

### Jisu An'tangko Bobilna On'gniko Agansoa

**21** Jisu duk ong'bee aganaha, "Beben anga na'simangna agana, na'simangoni saksa angko bobilni jako on'gen." **22** Sninggiparang jajajiji dake saksa sakgipinko nitatgrikaha; maina ua sakon miksongachim uamang uijaha. **23** Uni Sninggiparangoni saksa, jena ua ka'saachim Jisuni jakrachi asongengachim. **24** Simon Pitor ua sake miksongachim me'sokchina uko mikijapataha. **25** Jisuni ka'bako dan'dana gnang ua sing'e aganaha, "Gigel, uara sawa?" **26** Jisu aganchakaha, "Jena anga ia pitta tong'sako ringchakanio sim'bole on'gen, uan ua." Unon ua pitta tong'sako sim'bole, uko ra'ongkate Simon Iskariotni depante, Judasna on'aha. **27** Ua uko man'oa Satan uo napaha. Jisu una aganaha, "Na'a jeko daknasia, uko bakbakan dakbo." **28** Ua maina iako aganaha; uano asonggiparangoni pilakba uko uijaha. **29** Mitam chanchiaha, Judas rongdikko rikkiengani gimin, alaona maikoba brechina, ong'jaoba kangalrangna maikoba on'china, Jisu una aganenga inesa chanchiachim. **30** Uandaken ua pittako cha'manarin, uanoni ttraken re'ongkatangaha. Unon walahachim.

### Gital Ge'etani

**31** Ua re'ongkatangmanoa, Jisu aganaha, "Da'o Mandeni Depanteko

rasong chaatgen. **32** Unon Isolko rasong chaatahaode, Isolba uko an'tangni mikkango rasong chaatgen, aro ua uko bakbakan dakgen. **33** Angni dederacharang dikdiksana anga na'simang baksa dongkugen. Anga Jihudirangna aganaha gitan, na'simangnaba agana. "Na'simang angko am'gen, indiba jeona anga re'anga; na'simang uanona re'bana amja." **34** Ge'eta gitalko anga na'simangna on'a. Na'simang ka'sagrikbo; anga na'simangna ka'saaha gitan na'simangba ka'sagrikbo. **35** Na'simangni ka'sagrikachin na'simangko pilakan angni sninggiparang ong'a ine uigen."

### Pitorni Jechakaniko Jisu Agansoa

**36** Simon Pitor Una aganaha, "Gitel, na'a bachina re'angenga?" Jisu aganchakaha, "Anga jeona re'a na'a da'o ang baksa re'bana man'ja; indiba ja'mano re'bapagen." **37** Pitor una aganaha, "Gitel, da'o anga maina re'bapana man'jawa? Anga nang'ni a'sel janggitangkon on'chakgen." **38** Jisu aganchakaha, "Na'a angni a'sel janggitangko on'chakgenma? Beben anga nang'na agana angko changgittam jechakkujaskal do'o gisikjawa."

14

### Jisuan Pagipaona Rama

**1** Na'simangni ka'tongko jajrengatnabe; Isolo bebera'bo aro angoba bebera'bo. **2** Apani noko bang'en dringrang gnang. Indake ong'jagenchimode, anga na'simangna agangenchim. Anga na'simangna biapko tarina re'nasia. **3** Anga re'ange na'simangna biapko tarisoe, anga re'bapile na'simangko an'tangona rimanggen; jedakode jeo anga donga na'simangba dongpana man'gen. **4** Anga baona re'angenga ramako na'simang uia." **5** Thomas una aganaha, "Gitel, na'a baona re'angenga, chingade uija; ramako chinga maidake uigen?" **6** Jisu una aganaha, "Angan rama, bebe aro janggi. Angko re'jaode pilakba Apaona re'ja. **7** Na'simang angko uiode angni Pagipakoba uia. Da'ontaltal na'simang uko uia aro uko nikaha." **8** Philip una aganaha, "Gitel, chingna Pagipako me'sokbo, unon

chingna chu'onga." **9** Jisu una aganaha, "Indita ru'ute anga na'simang baksa dongaha, indiba na'a angko uikujama, Philip? Angko nikipa Pagipakoba nikaha, indide na'a maidake agana, 'Pagipako chingna mesokbo?' **10** Anga Pagipao gnang aro Pagipa angong nang ine na'a bebera'jama? Na'simangna jeko agana anga uko an'tangoniko aganja; indiba Pagipa angong donge an'tangni kamrangko daka. **11** Anga Pagipao gnang aro Pagipa angong nang ine bebera'bo, ong'jaode, ia kamrangni giminan bebera'bo. **12** Beben anga na'simangna agana, angko bebera'gipa, anga je kamrangko dakenga uaba uarangko dakgen; aro iarangna bateba dal'bata kamrangko ua dakgen. Anga Pagipaona re'angenga, **13** aro jeko na'simang angni bimingo bi'gen uko anga dakgen; jedakode Depanteo Pagipako rasong chaatna man'gen. **14** Angni bimingo na'simang maikoba bi'ode, anga uko on'gen."

### Gisik Rongtalgipako Ku'rachaka

IS Na'simang angna ka'saode angni ge'etanirangko manigen. **16** Anga Pagipao bi'gen aro na'simangna dakchakgipa, sakgipinko ua na'simangona watatgen, aro ua jringirotan na'simang baksa dongkamgen. **17** Uan bebeni Gisik, jeko a'gilsak ra'chakna man'ja; maina ua uko nikaba nikja aro uiaba uija; indiba na'simangde uko uia; ua na'simang baksa donga aro na'simangon donga. **18** Anga na'simangko dakchaka gri watangjawa; anga na'simangona re'bagen. **19** Dikdiksani ja'manon a'gilsak angko niktajawaha; indiba na'simang angko nikgen; maina anga tanga, na'simangba tanggen. **20** Unsalo anga angni Pagipao gnang aro anga na'simango gnang ine na'simang uigen. **21** Angni ge'etanirangko uie uarangko manigipaan angna ka'sagipa ong'a, aro angna ka'sagipa Pagipani ka'saako man'skagen, aro anga una ka'see an'tangko una parape'gen." **22** Judas una aganaha, "Gitel, agilsakna parape'gija na'a an'tangko chingna parape'nasienga, ian maikai ong'na ama?" **23** Jisu una aganchakaha, "Saoba angna ka'saode, ua angni kattako manigen aro Apaba una ka'sagen; unon chinga uona re'bae, uo donggen, **24** Angna ka'sagijagipa angni kattarangko manija. Na'simang je kattarangko knaenga, uan angni ong'ja, indiba angko watatgipa Pagipanisa. **25** "Anga na'simang baksa



dongengpittion ia kattarangko na'simangna aganman'aha. **26** Angni bilingo Apa na'simangna Dakchakgipa, Gisik Rongtalgipako watatgen. Ua na'simangna pilakkon skigen aro anga jerangko na'simangna aganaha uarangko gisik ra'atgen. **27** Tom'tomanileo anga na'simangna donanga, — a'gilsakni on'a gita ong'ja, anga an'tangni tom'tomanikon na'simangna on'a. Na'simangni ka'tongko jajrengatnabe aro kennabe. **28** 'Anga re'angenga aro anga na'simangona re'bapilgen,' ine angni aganako na'simang knaaha. Na'simang angna ka'saode, anga Pagipaona re'angengani gimin na'simang katchagenchim; maina angna bate Pagipa dal'bata. **29** Ia ong'na sakng anga da'omangba na'simangna aganman'aha, jedakode iarang chu'sokoa, na'simang bebera'na man'gen. **30** Anga na'simang baksa bang'e agangrikchajawaha, maina ia a'gilsakko sason ka'gipa re'baenga. Ua angni kosako bil man'ja; **31** indiba anga Pagipana ka'saa, aro Pagipani angna ge'etaha gita, anga dakenga ine a'gilsak uina man'na gita ia pilakan ong'gen. "Chakatbo, hai an'ching ianoni re'na."

15

### Jisuan Draka Budu Chong'mot

**1** "Angan Draka budu chong'mot, aro angni Pagipa gamgipa ong'a. **2** Ango bite nanggijagjpa cheksiantiko ua den'e gala, aro bite nanggipa cheksiantiko ua rongtalata, jedakode ua bang'bate bite nangna man'gen. **3** Angni na'simangna agangimin kattarangchin na'simang rongtalatako man'aha. **4** Ango dongkambo aro anga na'simango dongkamgen; cheksi buduo dongkamjaode an'tangan bite nangna amja, uandaken na'simangba angoo dongkamjaode bite nangna amja. **5** Angan draka budu na'simanga cheksirang ong'a; jeo anga dongkama, aro jean angoo dongkama ua bang'en bite nanga maina angna agre na'simang mamingkoba dakna amja. **6** Soba angoo dongkamjaode, cheksiko gita uko a'palchi galata aro ua ran'a. Ua cheksirangko chimonge wa'alo gala aro uarangko kama. **7** Na'simang angoo dongkamode aro angni kattarang na'simango dongkamode, jeko nanga na'simang bi'bo aro na'simangna on'gen. **8** Na'simang angni chong'motgipa

sninggiparang ong'e, bang'en bite nangachisan angni Pagipako rasong cha'atgen. **9** Pagipa jedake angna ka'saaha, angaba na'simangna ka'saa. Na'simang angni ka'saaon dongkambo. **10** Anga jedake Pagipani ge'etanirangko mania aro uni ka'saaon dongkama; uandaken na'simanga angni ge'etanirangko maniode angni ka'saaon dongkamgen. **11** Angni katchaa maikai na'simaango dongkamgen, aro na'simangni katchaa maikai chusokgen anga iako na'simangna aganaha. **12** Ian angni ge'etani ong'a, anga jekai na'simangna ka'saaha na'simangba indaken ka'sagrikbo. **13** Janggitiangko ripengtangna on'chakana bate dal'batgipa ka'saani gri. **14** Na'simang angni ge'etanirangko maniode angni ripengrang ong'a. **15** Anga na'simangko chakkolrang injawaha, maina giteltangni dakengako chakkol uija; indiba anga na'simangko ripengrang inaha; maina Apaoniko pilak knagiminko anga na'simangna uiataha. **16** Na'simangde angko sejachim; indiba angasa na'simangko seaha, aro na'simang re'ange dongkamgipa biteko nangna gita anga na'simangko donaha. Uni gimin angni bimingo na'simang Pagipao jeko bi'gen, ua na'simangna on'gen. **17** Iakon anga na'simangna ge'eta; na'simang ka'sagrikbo.

## A'gilsakni Mitchiani

**18** A'gilsak na'simangko mitchiode, na'simangko mitchina skangan angkon mitchiaha ine na'simang uibo. **19** Na'simang a'gilsakni ong'genode, a'gilsak an'tangnina ka'sagenchim. A'gilsak na'simangko mitchia, maina na'simang a'gilsakni ong'ja; indiba anga na'simangko a'gilsakonikon seaha. **20** Na'simangna anga jeko aganaha gisik ra'bo. Giteltangna bate chakkol dal'batja; uamang angkon arikahaode, na'simangkoba a'rikgen. **21** Angni bimingni a'sel uamang ia pilakkon na'simangna dakgen; maina uamang agko, watatgipakon uija. **22** Anga re'bae uamangna aganjagenchimode uamangni pap dongjawachim; indiba da'ode uamango papna pasikani dongjaha. **23** Angko mitchigipa angni Pagipako mitchia. **24** Pilakni dakkugijagipa kamrangko anga uamangni gisepo dakjagenchimode, uamangni pap dongjawachim; Indiba uamang angni kamrangko nikmanaha; indioba uamang angko aro angni Pagipako mitchiaha. **25**

"Maming a'sel grian uamang angko mitchiaha", ine uamangni Niamo ia segimin kattarang chu'sokna gita iarang ong'aha. **26** Anga na'simangona Pagipaoniko Dakchakgipako wataton, Ua bebeni Gisik Pagipaoni re'bae, angni gimin sakki ong'gen. **27** Na'simangba angni sakkirangan ong'a; maina a'bachengantal na'simangba ang baksanchim."

16

**1** "Bebera'aoni ga'akjana gita anga iarangko na'simangna aganmanaha. **2** Uamang na'simangko sinagotoniko a'pal galatgen; sal re'baenga, jeo na'simangko so'otgipa, toromni kamko dakenga ine chanchigen. **3** Uamang Pagipakoba aro angkoba uijani gimin iako dakgen. **4** Iarangko anga na'simangna aganaha, jedakode na'simangna ong'ahaon, anga na'simagna uamangni gimin mikrakatmanaha ine gisik ra'na man'gen.

### Bonkamgipa Kattarang

A'bachengon anga na'simangna iarangni gimin aganjachim, maina anga na'simang baksanchim. **5** Indiba da'o anga angko watatgipaona re'angenga, aro na'simangoni saksaba "Na'a bachina re'anga?" ine ango sing'jaha. **6** Indiba anga iarangko na'simangna aganahani gimin na'simangni ka'tongrango tikkelan gapaha. **7** Indiba anga na'simangna bebekon aganenga; na'simangni namgninan anga re'angenga; maina anga re'angjaode, ua Dakchakgipa na'simangona re'bajawa; indiba anga re'angahaode anga uko na'simangona watatgen. **8** Ua re'baon a'gilsakna papni gimin, bebeni gimin, aro Isolni bichalni gimin uiatgen. **9** Angko bebera'gijanian pap ong'a ine ua mesokgen. **10** Anga Pagipaona re'angenga aro na'simang angko nikjawaha, iachi bebeko mesokgen. **11** Ia a'gilsakni sason ka'gipako bichal ka'aha ine mesokachi, bichalni gimin sakki on'gen. **12** "Na'simangna angni agangni bang'en gnangpitti; indiba da'o na'simang uarangko chakna amja, **13** Bebeni gisik re'baon, ua na'simangko pilak bebeona dilgen; maina ua an'tangoniko agangen aro ua ong'gnirangkoba na'simangna parakatgen. **14** Ua angna rasongko on'gen; maina ua angni

agangniko angoniko ra'e na'simangna aganskagen. **15** Pagipao je gnan pilakan angnin; uni giminan anga aganaha, chong'motan Gisik angni on'ako ra'chake, na'simangna agangen."

## Duk Aro Katchaani

**16** "Dikdiksani ja'mano na'simang angko nikjawaha," aro dikdiksani ja'manon na'simang angko niktaigen." **17** Uni sninggiparangoni mitam saksa sakgipinna aganaha, "Ua chingna aganenga, 'Dikdiksani ja'manon na'simang angko nikjawaha, aro dikdiksani ja'manon na'simang angko nikgen, maina anga Apaona re'angenga.' Iani miksongara mai?" **18** Uni gimin uamang aganaha, 'Dikdiksani ja'manon' ine aganengara maiako miksonga? Ua maini gimin aganenga an'ching uija.'" **19** Jisu uamangni an'tango sing'nasiako uie uamangna aganaha, "Na'simang an'tangtangni gisepo maiko agangrikenga? Dikdiksani ja'manon na'simang agko nikjawaha; pi'le dikdiksani ja'manon na'simang angko nikgen, ine angni aganani giminanma?'" **20** Beben' anga na'simangna agana, na'simang kalimgen aro grapgen, indiba a'gil sak katchagen. Na'simangko duk ong'atgen; indiba na'simangni duk katchaani ong'pilskagen. **21** An'pakmitingo ma'gipa saknabee duk man'a maina uni sal ong'aha; indiba bi'sako jako man'ahaon, a'gilsako de mikkang nikahani gimin ua katchaa aro ua an'tangni saknaako gisik ra'jaha. **22** Na'simangba da'o duk ong'a, indiba anga na'simangko niktaigen aro na'simagni ka'tong katchagen, aro na'simangni katchaako na'simangoniko pilakba ra'angjawa. **23** Unsalo na'simang ango singjawaha. Beben anga na'simangna agana, Pagipao na'simang maikoba bi'ode, angni bimingo ua na'simangna uko on'gen. **24** Da'ona kingkingba na'simang angni bimingo mamingkoba bi'kuja. Bi'bo unon na'simang man'gen, Jedakode na'simangni katchaa chu'sokgen."

## A'gilsakko Cheani

**25** "Iarangko anga na'simangna toesan aganaha; sal re'baenga anga na'simangna idake againjaha; indiba Pagipani gimin anga na'simangna talen

agangen. **26** Unsalo na'simang angni bimingo bi'gen aro anga nasimangni pal Pagipao bichakgen ine anga aganja. **27** Pagipa an'tangan na'simangna ka'saa maina na'simang angna ka'saaha aro anga Isoloni re'baa ine bebera'aha. **28** Anga Pagipaoni ia a'gilsakona re'baaha. Pil'e anga a'gilsakko watange Pagipaona re'angenga." **29** Uni sninggiparang aganaha, "Ah! Da'ode na'a toe agangija rongtalen aganenga. **30** Na'a pilakkon uia, ine chiga uia, aro darangba nang'o sing'na nangjaha. Na'a Isoloni re'baa ine chinga iachin bebera'a." **31** Jisu uamangna aganchakaha, "Da'ode na'simang bebera'ama? **32** Nibo, sal re'baenga aro sokaha, na'simang sakprakprakan angko saksan gale noktangtangchl katanggen, aro na'simang bilding bildangatako man'gen. Indiba anga saksan ong'jawa, maina Pagipa ang baksa donga. **33** Na'simang anggo tom'tomaniko man'na gita anga iarangko na'simangna aganaha. A'gilsako na'simang duk man'begen, indiba ka'dongbo anga a'gilsakko chemanaha."

17

## Jisu An'tangni Sninggiparangna Bi'a

**1** Jisu iarangko agane salgichiko nigite inaha, "Apa, sal sokaha, nang'ni Depanteko rasong chaatbo, jedakode ua nang'ko rasong chaatna man'skagen. **2** Maina na'a una on'gimin pilakna jringjrotni janggiko on'china pilak manderangni kosako una bilko on'aha. **3** (Nang'ko, saksangipa Isol chong'motko aro nang'ni watatgipa Jisu Kristoko uiaan jringjrotni janggi ong'a.) **4** Nang'ni angna dakna on'gimin kamko anga chu'sokate, anga ia a'sako nang'ko rasong chaataha. **5** Apa, a'gilsak ong'bana skangan anga nangbaksa je rasongo dongachim; uchi da'o nang'ni sambao angko rasong chaatbo. **6** "Ia a'gilsakoniko jemangko na'a angna on'aha, ua manderangna anga nang'ni bimingko parape'aha. Uamang nang'ninchim, na'a uamangko angna on'aha aro uamang nang'ni kattako maniaha. **7** Da'ode, pilak nang'ni angna on'giminrang nang'onin ong'a ine uamang uia; **8** maina nang'ni angna on'gimin kattarangko anga uamangna on'aha. Uamang uarangko ra'chakaha aro anga nang'oni ong'a ine uamang skie ra'aha; aro na'an angko watataha

ine uamang bebera'aha; **9** Anga a'silsakna bi'jaenga, indiba nang'ni angna on'giminrangnasa; maina uamang nang'nin ong'a. **10** Angni pilakan nang'nin ong'a aro nang'ni pilakan angnin ong'a; aro anga uamangon rasong chaatako man'aha. **11** Angade a'gilsako dongjawaha, maina anga nang'ona re'nasia; indiba uamangde a'gilsakon ong'a. Rongtalgipa Apa, jemangkon na'a angna on'aha nang'ni bimingo na'a uamangko rakkibo; jedakode an'chinga jekai ong'a uandaken uamangba an'san ong'na man'gen. **12** Uamang baksa anga dongmitingo, nang'ni angna on'giminrangko anga nang'ni bimingo rakkiaha, aro anga uamangko nitimaha. Uamangoni gimagnigipa mandena agre pilakba gimajaha; ian Sastroni katta gita chu'sokgen. **13** Da'o anga nang'ona re'baenga; a'gilsako iarangko anga aganenga jedakode angni katchaa uamango chu'sokna man'gen. **14** Anga uamangna nang'ni kattako on'aha, aro a'gilsak uamangko mitchiaha; manina anga jedake a'gilsakni ong'ja, uamangba a'gilsakni ong'ja. **15** Uamangko a'gilsakoniko ra'angna nanga ine anga bi'jaenga, indiba namgijagipaoniko uamangko rakkibo ine bi'a. **16** Anga jedake a—gilsakoni ong'ja uandaken uamangba a'gilsakoni ong'ja. **17** Nang'ni katta bebe ong'a, uamangko bebeo rongtalatbo. **18** Na'a angko a'gilsakona watataha gita, angaba uamangko a'gilsakona watata. **19** Umangni a'sei anga an'tangko on'kangaha, jedakode uamangba bebena an'tangtango on'kangna man'gen. **20** Uamangnamangmansan anga bi'jaenga; indiba jemangan uamangni kattachi anggo bebera'a, uamangnaba bi'a. **21** Uamangba an'san ong'china. Apa, jedake na'a anggo donga aro anga nang'o donga, uandaken uamangba an'chingo dongchina; maikai na'an angko watataha ine a'gilsak bebera'na man'gen. **22** Nang'ni angna on'gimin rasongko anga uamangna on'aha, jedakode an'chinga an'san ong'a gita, uamangba an'san ong'na man'gen. **23** Anga uamango donga, aro na'a anggo donga, jedakode uamang an'san ong'srangna man'gen, maikai na'a angko watataha aro na'a angna ka'saaha gita, angaba uamangna ka'saa ine a'gilsak uina man'gen. **24** Apa, anga jeo donga uano nang'ni angna on'giminrangni dongpaako anga namnika. Maikai a'gilsak ong'na skangan nang'ni angna ka'sae on'gimin rasongko uamangba nikgen. **25** O, Kakketsranggipa Apa, a'gilsak nang'ko uikuja, indiba anga nang'ko uiaha, aro na'a angko watataha



ine ia manderang uiaha. **26** Anga nang'ni bimingko uamangna uiatmanaha aro uiatangkugen; jedakode na'a je ka'saachi angna ka'saaha ua ka'saani uamangoba donggen, aro angaba maikai uamango donggen.

18

## Jisuko Rim'a

**1** Jisu irangko aganmanon ua an'tangni sninggiparang baksa Kidron chiring nalsachi donggipa bari damsaona re'angaha. **2** Uko bobilni jako on'nasienggipa Judasba ua biapko uiachim; maina Jisu an'tangni sninggiparang baksa uano tom'rongachim. **3** Judas sipairangni kotoksako aro kamal dal'giparangni aro Pharisirangni peadarangko rime tochrirang bilchamrang aro silchidarerang baksa uanona re'baaha. **4** Jisu an'tangna pilak ong'nasiengako uie, re'ongkatbae uamangna aganaha, "Na'simang sako am'enga?" **5** Uamang una aganchakaha, "Nazarethoni Jisuko." Ua uamangna aganaha, "Angan Ua," Unon uko bobilna on'nasienggipa Judasba uamang baksa donggachim. **6** "Angan Ua," ine Jisu uamangna aganahaon, uamang tang'pile a'ao ga'akaha. **7** Uni gimin Ua Uamango sing'taiaha, "Na'simang sako am'enga?" Uamang aganaha, "Nazarethoni Jisuko." 'Jisu aganchakaha, 'Angan Ua' ine anga na'simangna aganaha, Na'simang angko am'engode ia manderangko watatbo." **9** 'Nang'ni angna on'giminrangoniko anga saksakoba gimaatkuja.' ine uni agangimin kattarang chu'sokna gita ia ong'aha. **10** Simon Pitor an'tango donggipa tonualko saloke, kamal Dal'batgipani nokkolko dokaha aro uni jakrani nachilko den'pakataha. Ua nokkolni bimingko Malkus mingachim. **11** Jisu Pitorna aganaha, "Nang'ni tonualko chukopo chippilbo. Apa jeko angna on'aha, ua ringchakaniko anga ringna nangjawama?"

## Jisuko Annasni Mikkangona Rimanga

**12** Sipairangni kotok, uamangni dilgipa aro Jihudirangni Peadarang Jisuko rim'e kaaha. **13** Uamang uko Annasona rimangchengaha; maina uan ua

bilsio Kamal Dal'batgipa, Kaiaphasni o'bite ong'achim. **14** Manderangna saksa mandeni sian nama ine Jihudirangna ku'pattigipa Khaiaphasan ong'achim.

### Pitor Jisuko Jechaka

**15** Simon Pitor aro sakgipin sninggipa Jisuko ja'rikangaha. Ua sninggipa Kamal Dal'batgipako uiachim; aro ua Kamal Dal'batgipani sara ning'chi Jisu baksa napangpa'aha. **16** Indiba Pitor cholgugani a'palchi chadenge dongengachim. Uni gimin ua sakgipin sninggipa, Kamal Dal'batgipani uigipa re'ongkatange, do'ga dongtingipa me'chik bi'sana agane, Pitorko ning'china rimbaaha. **17** Ua me'chik bi'sa Pitorna aganaha, "Na'aba ia mandeni sninggiparangoni saksa ong'jama?" Ua aganaha, "Angade ong'ja." **18** Sin'ani gimin nokkolrang aro peadarang anggalni wal'timko so'e wai'tim chaktokengachim. Pitorba uamang baksa chadenge wa'al chakpaengachim.

### Kamal Dal'batgipa Jisuko Sing'roka

**19** Kamal Dal'batgipa Jisuko Uni sninggiparangni gimin aro uni skiani gimin sing'aha. **20** Jisu una aganchakaha, "Anga a'gilsakna paraken aganaha. Anga pangnan Sinagogrango aro Torom noko, jeo Jihudirang tom'a, uamangna skiaha, aro anga mamingkoba donnue agan'jachim. **21** Na'a maina angko sing'a? Anga uamangna maiko aganachim, ua knagiparango sing'bo, uamangan uitoka." **22** Ua iarangko aganon, sepango chadengenggipa peadarangoni saksa Jisuko natengo satkape aganaha. "Na'a Kamal Dal'batgipana indake aganchakama?" **28** Jisu una aganaha, "Anga ong'gija dake aganahaode, ong'gijako mesokbo; indiba kakket ong'ode, maina angko doka?" **24** Unikoa Annas uko kaa gnanng Kaiaphas Kamal Dal'batgipaona watataha.

### Pitor Pil'e Jisuko Jechaka

**25** Simon Pitor chadenge wal'tim chakengachim; uamang una aganaha,

"Na'aba uni sninggiparangoni saksa ong'a." Ua jechaksrange aganaha, "Angade ong'ja." **26** Pitorni nachil den'pakgipa mandeni ma'drang, Kamal Dal'batgipani nokkolrangoni saksa aganaha, "Anga bario unbaksa nang'ko nikjachimma?" **27** Pil'e Pitor jechaktaiaha, aro bakan do'o gisikaha.

## Jisuko Pilatona Rimanga

**28** Uamang Jisuko pringwalni Kaiaphasoniko Governorni nokona rirangaha. Jihudirang an'tangtangde ua nokona napangjaha, maina uamang uanona napangode marang nangatako man'e Watchangani Alaniko cha'na man'jawachim. **29** Unon Pilat an'tangan a'palona re'bae uamangna aganaha. "Ia mandeni kosako na'simang mai matnanganiko ra'baa?" **30** Uamang una aganchakaha, "Ia mande namgijako dakgipa ong'jagenchimode, chinga uko nang'ni jako on'jawachim." **31** Pilat uamangna aganaha, "Uko na'simang an'tangtangan rimange na'simangni niam gita bichal ka'bo." Jihudirang una aganchakaha, "Mandeko so'otna chingo bil dongja." **32** Maidake Jisu sina nanggenchim, uni agansogimin gita chu'sokna ian ong'aha. **33** Pilat nokchina re'pilangenba Jisuko okamate uo sing'aha, "Na'a Jihudirangni Raja ong'ama?" **34** Jisu aganchakaha, "Na'a iako an'tang gisikonikon aganengama, ba sakgipinrangsa angni gimin nang'na agane on'ahama?" **35** Pilat aganchakaha, "Anga Jihudima? Nang'ni ma'kring aro Kamal dal'giparangsa nang'ko angni jako on'aha. Na'a maiko dakaha?" **36** Jisu aganchakaha, "Angni songnok ia a'gilsakoni ong'ja. Angni songnok ia a'gilsakoni ong'genchimode, angko Jihudirangni jako on'jana gita angko ja'rikgiparang dakgrikchakgenchim; indiba angni songnok ia a'gilsakoni ong'ja." **37** Pilat una aganaha, "Indide na'an raja ong'ama?" Jisu aganchakaha, "Angan raja ong'a ine na'an aganaha; ianan anga atchiaha aro bebena sakki on'na anga a'gilsakona re'baaha. Bebeo dongkamgipa sakanti angni ku'rangko knachaka." **38** Pilat una aganaha, "Indide bebea mai?" Iako aganenba ua Jihudirangona re'angpile uamangna aganaha, "Anga uo maming namgijako nikjaha."

## Jisuko So'otna on'a

**39** Pilat aganangkuaha, "Indiba na'simangni dakbewal gita, anga watchangni Alani salo na'simangna koidi saksako watna nanga. Jihudirangni Rajako anga watode, na'simang namnikgenma? **40** Uamang a'bokchakaha, "Ukode ong'ja, Barabbaskosa." (Barabbas saksa dokprete ra'gipa ong'achim.)

19

**1** Unon Pilat Jisuko rim'e betsmitchi dokataha, **2** aro sipairang bu'suni mukutko wate uni skoo stikataha, aro ba'ra gitchakmrangko chinataha. **3**

Uamang uona re'bae aganengachim, "Salam, Jihudirangni Raja," aro uko satkaptokengachim. **4** Pilat a'palchi re'angpile Jihudirangna aganaha, "Nibo, anga uo maming namgijako nikja ine mesokna anga uko na'simangona rimongkatbaenga." **5** Uni gimin Jisu bu'surangni mukutko stikja gnang aro ba'ra gitchakmrangko china gnang a'palona re'baaha. Pilat uamangna aganaha, "Nibo, Mandekol." **6** Indiba Kamal dal'giparang aro peadarang uko nikon, jrojro a'boke intokaha. "Uko Chisolo datkapbo! uko Chisolo datkapbo!" Unon Pilat uamangna aganaha, "Na'simang an'tangtangan uko rimange chisolo datkapbo; maina angade uo maming namgijako nikja." **7** Jihudirang aganchakaha, "Chingni niam gnang, aro ua niam gita ua sina nangchongmota; maina ua an'tangko Isolni Depante dakaha." **8** Iako knaoa Pilat kenbataha, **9** aro ua nokchina re'angpile Jisuna aganaha, "Na'a baoni re'baa?" Jisu una mamingkoba aganchakjaha. **10** Unon Pilat aganaha, "Na'a angna aganna jechakama? Anga nang'ko watna aro nang'ko chisolo datkapna bil gnang ine na'a uijama?" **11** Jisu aganchakaha, "Na'a kosakoni bilko man'jaode, na'a angni kosako maming bilkoba man'jawachim. Uni gimin angko nang'ni jako on'gipani papan dal'bata." **12** Iako knae Pilat uko watna am'beahachim; indiba Jihudirang jrojro intokaha, "na'a ia mandeko watode, Caesarni ripeng ong'ja; an'tangko raja dakgipa sakanti Caesarko warachaka." **13** Pilat ia kattarangko knaahaon, Jisuko apalona rimongkatbataiaha; aro "Ro'ong Angimin" minggipa bichal ka'ram biapo asongaha; jeko Ibri Ku'sikchi

"Gabbatha" mingachim. **14** Ian Watchangani Alanina skangipa salni saljatchimango ong'achim. Ua Jihudirangna aganaha, "Nibo, ian na'simangni Raja!" **15** Uamang jrojro a'boke inaha, "Uko so'otbo! Uko so'otbo! uko chisolo datkapo!" Unon Pilat uamangna aganaha, "Anga na'simangni Rajako chisolo datkapboma?" Kamal dal'giparang aganchakaha, "Caesarna agre chingni gipin raja grL" **16** Unon uko chisolo datkapchina, ua uamangni jako on'aha,

## Jisuko Chisolo Datkapa

**17** Uamang Jisuko rimangaha aro ua an'tangni chisolko ripee "Skobikrok" (Golgotha) minggipa biapona re'angaha. **18** Uano unbaksa samtangtangchi sakgipin sakgniko, Jisuko jatchio done, chisolo datkapaha. **19** Pilat uiataniko see chisolni kosako donaha, "NAZARETHONI JISU, JIHUDIRANGNI RAJA" ine seachim. **20** Jihudirangoni bang'en ia uiataniko poraiaha; maina je biapo Jisuko chisolo dakapachim, uan songjimnani sepangchim. Uko Ibrī, Latin aro Greek ku'sikrangchi seaha. **21** Uni gimin Jihudirangni Kamal dal'giparang Pilatna aganaha, 'Jihudirangni Raja' ine sepanabe; indiba 'Angan Jihudirangni raja ong'a ine Ua aganaha,' ine seskabo," **22** Pilat aganchakaha, "Anga jeko, seaha, seaha." **23** Sipairang Jisuko chisolo datkapman'ahaoa, uamang uni ba'rarangko bak bri dake suale ra'aha; sipai sakprakan bakprak man'achim. Uamang cholakoba ra'aha, ua kosakoni intal sikgimikgipa, biritchu grigipa ong'achim. **24** Uni gimin uamang agangrikaha, "Hai an'ching iako chitjana, indiba ua sani ong'gen, una chitti kale nina." Sastroni kattarang maikai chu'sokgen, sipairang iako dakaha: "Uamang an'tangtangni gisepo Suale ra'aha angni, ba'rarangko; Angni gana chinanina Uamang kal'aha chittiko." **25** Da'o Jisuni ma'gipa, uni ma'jongtang, Klopasni jikgipa Mariam aro Magdalene Mariammang uni chisol sambao dongengachim. **26** Jisu an'tang magipako aro uni sepango chadenggipa ka'sara sninggipako nike, an'tang ma'gipana aganaha, "Ama, nibo, nang'ni depanteko." **27** Unon ua sninggipanaba aganaha, "Nibo, nang'ni magipako" Un salintal, ua sninggipa uko an'tang nokona rimangaha.

## Jisuni Sia

**28** Da'o pilakan chu'sokmanaha ine Jisu uiaha. Unon Sastro chu'sokna gita ua aganaha, "Anga ringna sika". **29** Meseng bitchian gapgipa rangkare uano gnanchim, aro uamang uko spongjoo simchope, go'olo siksepe uni ku'sikona donataha. **30** Ua meseng bitchiko ringchopman'oa aganaha, "Pilakan chu'sokaha." Unon ua sko choknoke janggi galaha.

## Jisuko Oksiko Su'a

**31** Uan Sambasiani sal ong'achim. Uni gimin Jihudirang chisolo datkapa man'gipa manderangni ja'arangko pe'e, manggisirangko ra'angatchina Pitalko aganaha, Neng'takani salo bikaprangko chisolo donjana lwrnang iako dakaha. (Ua Neng'takani sal dal'achim.) **32** Uni gimin sipairang re'bae skanggipa mandeni aro ua sakgipin Jisu baksa datkapa man'gipani ja'arangko pe'aha. **33** Unon uamang Jisuona re'bae, ua simanaha ine niko a uni ja'arangko pe'jaha; **34** indiba sipairangoni saksa uni oksiko sel'uchi su'aha. Unon bakan an'chi aro chi ong'kataha. **35** (Na'simang bebera'na man'na gita, ian uko nikkapa saksani agana katta, aro uan bebe ong'a. Bebekon aganenga ine ua uia.) **36** "Uni greng dotsakoba be'atjaha;" ine segimin Sastroni katta chu'sokna gita iarang ong'aha. **37** "Uamang an'tangtangni su'giminko nigen." ine Sastroni damgipin bakoba sea gnangchim.

## Jisuko Gopa

**38** Iani ja'mano Arimatheani Joseph, Jihudirangna kene sriksrik Jisuni sningipa ong'pagipa, Jisuni manggisiko ra'angna Pilato bi'aha; aro Pilat uko ra'angchina on'aha. Uni gimin na re'bae Jisuni manggisiko ra'angjaha. **39** Unikoa skango, walo Jisuona re'bagipa, Nikodemusba, similgipa bringjimin mur aro agorko kilo sotbongamang ra'baaha. **40** Uandaken uamang Jihudirangni gopna tari bewalgita Jisuni manggisiko ua bringimin similgipa baksa mosina ba'rachi wenaha, **41** Uko chisolo datkapgipa biapo bari



damsa gnanchim; aro ua bario darangkoba gopkugijagipa gopram gital gesa gnanchim. **42** Jihudirangni sambasiani sal ong'ani gimin aro ua gopramba sepangon dongani gimin uamang Jisuko uanon donaha.

20

## Gop'ram Bangbang ong'a

**1** Antini skanggipa pringwalni, andalengpittion, Magdalene Mariam goprmona re'bae, goprmoni ro-ongko jitataha ine nikaha. **2** Uni gimin ua Simon Pitor aro Jisuni sakgipin ka'sara sninggipaona sketbakket katbae, uamangna aganeaha, "Uamang Gitelko goprmoniko raongkatangaha; uamang uko bano donaha chinga uija." **3** Uni gimin Pitor aro ua sakgipin sninggipa gopranchina re'chakatangaha. **4** Uamang sakgnian damsan katangaha, indiba sakgipin sninggipa Pitorna bate tarakbatani gimin katsekange goprmona skang sokcaha. **5** Ua gopram ning'chide napangsrangjaha, indiba gonggonge niuatoa mosina ba'rarangni ga'ake dongengako nikataha. **6** Simon Pitorba uko rikbae sokeaha aro uade gopranchinan napangsrang, mosina ba'rarangni ga'ake dongako nikaaha. **7** Uni skoo kagipa ba'rade mosina ba'rarang baksa dongjachim, indiba ua tome dingtang biapo dongachim. **8** Unon goprmona skang soksogipa, sakgipin sninggipaba napangsrang nikenba bebera'aha; **9** maina sigiminrangoni chakatna nanga ine Sastroo agana kattako uamang man'sikujaengachim. **10** Unon sninggiparang nokchi re'angpilaha.

## Jisu Magdalene Mariamna Mikkang Pa'a

**11** Mariam goprmoni a'palo chadenge grapengachim. Grapa gnan ua goprmona nina gonggongaha, **12** Ua Jisuni bimangko donram biapo, saksa skopangchi aro sakgipin ja'chokchi chinggipa sa'grerangni asongengako nikaha. **13** Uamang una aganaha, "Na'a maina grapenga?" Ua uamangna aganaha, "Uamang angni Gitelko ra'angaha, aro uko bano donaha anga uija." **14** Ua iako agane an'piloa, Jisuni chadengengako nikaha; indiba ua

Jisu ong'achim ine uijaha. **15** Jisu una aganaha, "Na'a maina grapenga? Na'a sako am'enga?" Uko bari gamgipa ine chanchie, ua una aganaha, "Skigipa, na'a uko ra'angahaode, uko bano donaha aganpabo, aro anga uko ra'anggen." **16** Jisu una aganaha, "Mariam." Unon ua an'pile Jihudi ku'sikchi una aganaha, "Rabboni" (Skigipa.) "Jisu una aganaha, "Na'a angko dangtapkunabe, anga Pagipaona gadoangkuja, indiba angni jongadarangona re'ange uamangna aganbo. 'Anga angni aro na'simangni Pagipaona, angni aro na'simangni Isolona doangenga." **18** Magdalene Mariam sninggiparangona re'ange aganaha, "Anga Gitelko nikaha," aro ua an'tangna agangiminrangko aganeaha.

### Jisu An'tangni Sninggiparangna Mikkang Pa'a

**19** Antini skangipa sal, Robibar attamchibara Jihudirangna kene, sninggiparang do'garangko chipchange dringo damsan tom'e dongtokengachim. Unon Jisu uamangni jatchiona re'bae chadengeaha, aro ua uamangna aganaha, "Na'simangna tom'tom ong'china." **20** Ua iako aganenba uamangna an'tangni jakrangko aro oksikko mesokaha, Sninggiparang Gitelko niko katchatokbeaha. **21** Jisu pil'e uamangna aganaha, "Na'simangna tom'tom ong'china. Pagipa angko watataha gita, angaba na'simangko watata." **22** Iako aganenba ua uamango spodape aganaha, "Gisik Rongtalgipako ra'chakbo. **23** Na'simang jemangni paprangko wata, uamangko wata, aro na'simang jemangni paprangko watja uamangko watja.

### Jisu Aro Thomas

**24** Sak chigntoni saksa Jonja minggipa Thomas, Jisuni re'baon uamang baksa dongjachim. **25** Gipin sninggiparang una aganaha, "Chinga Gitelko nikaha." Ua uamangna aganaha, "Anga uni jakrango, kojalarangni pariko nikjaskal, aro ua kojalarangni pario angni jaksichi jotape nijaskal, aro angni jakchi uni oksikko dangtape nijaskal anga mamingdakeba b;bera jawa." **26** Sal chetni ja'mano uni sninggiparang, nokningo dongtoktaiengachim; aro

Thomasba uamang baksanchim. Unon do'garangko chiptokachim aro Jisu uamangni jatchio chadenge aganaha. "Na'simangna tom'tom ong'china." **27** Unikoa ua Thomasna aganaha, "Angni jakrangko nibo aro nang'ni jaksiko snile iano jotapbo aro nang'ni jakrangko snile oksikko dangtapbo; bebera'gijagipa ong'nabe; indiba bebera'gipa ong'bo." **28** Thomas una aganchakaha, "Angni Gitel aro angni Isol." **29** Jisu una aganaha, "Na' angko nikahani gimin bebera'aha, jemangan angko niggija bebera'a uamang an'senga."

## Ia Ki'tapni Miksonga

**30** Ia ki'tapo sekugijagipa bang'bea chinrangkoba Jisu an'tang sninggiparangni mikkango dakaha; **31** indiba iarangkosan seaiaha; jedakode Jisuan, Kristo, Isolni Deapante ong'a ine na'simang bebera'na man'gen, aro bebera'enba, uni bimingo na'simang janggiko man'gen.

**21**

## Jisu Saksni Sninggiparangna Mikkang Pa'a

**1** Iani ja'mano Jisu Tiberias Sagalo sninggiparangna mikkang pa'aha; aro an'tangko indake mesokaha. **2** Simon Pitor, jonja minggipa Thomas, Galilini Kanaoni Nathanael, Zebedeeni depanterang aro gipin sakgni sninggiparang damsan dongtokengachim. **3** Simon Pitor uamangna aganaha, "Anga na'tok rim'na re'angenga." Uamang una aganaha, "Chingaba nang baksan re'gen." Uamang re'ange an'tangtangni ringo gakataha aro uamang walgimiko mamingkoba man'jaha. **4** Pring seng'oa Jisu chisamo chadengaha, indiba uan Jisu ong'a ine sninggiparang uijaha. **5** Jisu uamangna aganaha, "Dedrang, na'simang na'tok man'ama?" Uamang aganchakaha, "Dongja." **6** Ua uamangna aj;anaha, "Ringni jakrachipak chekko galatboching, unon man'gen." Uni gimin uamang chekko galataha, aro na'tok bang'ani giminan uamang chekko salnan man'japilaha. **7** Jisuni ka'sara sninggipa Pitorna aganaha, "Uan Gitel." Simon Pitor, "Uan Gitel"

ine knaon, an'tangni chinpakrako chingope, sagalo chokonpruangaaha; **8** indiba gipin sninggiparangde ringon, na'tokarigipa chekko sale re'baengachim; maina uamang a'gaoni chel'bea ong'jachim, mikritchagnimangsan ong'aigenchim. **9** Uamang a'gaona gakatoa anggalni wa'alo na'tok so'ako aro adita pittako nikeaha. **10** Jisu uamangna aganaha, "Da'o na'simangni rim'gipa na'tokrangoniko mitam ra'babo." **11** Simon Pitor ringona re'ange, dal'dalgipa, na'tokraragipa chekko a'gaona saldobaaha. Uano mangritchasa sotbonga gittam gnangchim, aro indita na'tok bang'oba chek grinjaha. **12** Jisu uamangna aganaha, "Re'babo mipring cha'ebo." Uan Gitel ong'achim ine uienba sninggiparangoni darangba "Na'a sawa?" ine sing'na pa'jaha. **18** Jisu re'bae pittako ra'e uamangna on'aha aro apsan dake na'tokkoba on'aha. **14** Siaoni chakatpilani ja'mano sninggiparangna Jisuni mikkang pa'a ian gittamgipa chang ong'achim.

## Jisu Aro Pitor

**15** Mipring cha'manon Jisu, Simon Pitorna aganaha, "Johanni depante, Simon, iamangna bate na'a angna ka'sabtama? Ua una aganaha, "Oe, Gitel, anga nang'na ka'saa ine na'an uia." Ua una aganaha, "Angni mes bi'sarangko nirokbo." **16** Gnigipa changna ua una agantaiaha, "Johanni depante, Simon, na'a angna ka'saama?" Ua una aganaha, "Oe, Gitel, anga nang'na ka'saa ine na'an uia." Ua aganaha, "Angni mesrangko nirokbo." **17** Gitamgipa changna ua una aganaha, "Johanni depante, Simon, na'a angna ka'saa'ma?" Pitor duk man'aha; maina chang gittamna kingking ua uo sing'aha, "Na'a angna ka'saama?" Ua una aganchakaha, "Gitel, na'a pilakkon uia, anga nang'na ka'saa ine na'an uia." Jisu una aganaha, "Angni mesrangko nirokbo. **18** Beben anga nang'na agana, na'a dambemitingode kang'kare kae jechina sika re'achim; indiba budepa ong'ahaon na'a jakrangko bawanggen, aro sakgipinrang nang'ni kang'kareko kae, jechi na'a re'na sikja uchinan rim'anggan." **19** Pitor maidakgipa siachi Isolko rasong chaatgen, uko mesoksoe ua iako aganaha. Ua iako aganenba una inaha, "Ang baksa re'bapabo."

## Jisu Aro ua Sakgipin Sningipa

**20** Pitor an'piloa, Jisuni ka'sara sninggipani ja'rikbaengako nikaha. (Uan miattam cha'mitingo, Jisuni ka'bako dangdale, 'Gitel, nang'ko sawa bobilni jako on'nasienga?' ine agangipa ong'achim.) **21** Pitor uko nikenba Jisuna aganaha, "Gitel, uara mai ong'gen?" **22** Jisu una aganaha, "Angni re'baona kingking uni dongako anga namnikode, nang'nara mai ong'a? Na'a ang baksa re'bapabo." **28** Uni gimin ua sninggipa sijawa ine jongadarangni gisepo agangrikani ong'aha. Indioba ua sijawa ine Jisu una aganjachim; indiba "Angni re'baona kingking uni dongako anga namnikode, nang'nara mai?" inesa aganachim.

## Aganchotani

**24** Ua sninggipaan iarangni gimin sakki on'gipa, aro uan iarangko see donaha; aro uni sakki bebe ong'a ine an'chinga uia. **25** Jisuni dakgimin kamrangba bang'en gnangpittichim, uarang mingprakprako setokode, anga chanchia segimin kittaprang ia a'gilsakon chakjawachim.